

本朝分省人物考

人物考卷之七十三目錄

福建延平府

張智

吳復

葉宜

李文殊

陳山

蔣伯良

黃琛

林同

劉璋

羅明

陳真

王旒

楊丹琅

吳謙

李勝

溫儀

林 埜

補遺

廖文昌

胡 瓊

田一儁

福建汀洲府

謝 柱

伍清源

丘子瞻

周子禮

張顯宗

張 愛

胡 時

沈仲繼

巫章瑤

羅 經

范金

張子才

賴世隆

王英

馬馴

劉敬

江瀚

鄭瑤

張秉和

俞瑤

丘弘

吳海

張彥銘

本朝分省人物考卷之七十三

福建延平府

張智

張智字玄略延平府順昌縣人自幼有大志聰明穎悟讀書過目成誦羣兒爲嬉戲之事必正色端謹如老成人侍父昇元學於南昌稍長卽能勵志於問學嘗慨然嘆曰采玉必於崑山探珠必於滄海士不出戶庭而爲學管窺蠡測抑安能有所至耶卽日挾策入元都交當時之名士用薦補入國學元季四方兵興以才出叅閩省機務省臣承制授同知新喻州事

已而知事不可爲浩然退歸 國朝初定卽建陽之

崇化里灑掃一室置古今書籍其中窮搜博覽沛然
有得於心鄉黨爭企慕之洪武十一年戊午以明經
應薦上吏部授夷陵州學正凡九載以內艱歸二十
四年服除入覲尚書趙勉薦於朝 太祖夙知其才

可用遂超拜禮部左侍郎卽首言宜以書籍頒布北
方學校議者以費財不便乃正色曰使賢才彙征利
益生民何惜此費衆太慚未幾實授右侍郎能秉禮
不遷綱紀秩然人皆敬服是時諸儒多有不稱任使
者至嬰顯僂上勅智等曰古之儒者務學以明體適

用窮則忠信篤敬以淑諸人達則忠君愛國澤被天下朕自御宇以來擢用儒士布列百司思得其人以稱其任而卒少見其效何也良由師道不立故成材罕聞爾禮部宜以朕言論天下俾凡爲儒者必恪遵古先聖賢之道以修己教人毋徒尚文藝云智請首行於大學從之智尋奏言歲貢生員舊制中式者送國子監不中者罪有司停學官俸生員罰爲吏今不中者遣還讀書有司教官罰如故是生員不率教者無所勸懲也 上廼命更定其制壬申三月懿文太子薨命禮部議喪禮智上議曰 皇帝當以日易月

服齊衰十二日祭畢釋之在內文武百官卽日於公署齋宿素服入臨明日素服行奉慰禮在外文武百官聞喪易服於公署哀次日成服行禮其內外文武百官行祭禮者自備儀物 上曰朝廷府庫百官俸祿皆出於民今祭祀儀物令光祿寺供具百官惟致哀行禮餘如智議尋以時享在邇令智與翰林院叅考古制智等奏曰王制三年不祭惟祭天地社稷不敢以卑廢尊也今定議天地社稷先師歷代皇帝須用樂外惟 太廟乃祖先神靈所在既有喪而時享仍用樂恐神不樂聽宜備而不作 詔從之其所建

白多此類會高麗國恭愍王薨無嗣國人共推成桂
主國事 上曰高麗限山隔海非我中國所治且其
間事有隱曲豈可遽信命智移文聽其自爲聲教二
十六年以事左遷國子學錄尋陞博士建文中陞司
業能誘掖獎勸無不底於造就其教人一本於道德
仁義孜孜焉開導後進老而弗衰一時學者莫不宗
之永樂初 成祖幸學特蒙寵異賜予甚厚四年卒
於官年七十有二士大夫莫不悼惜之

吳復

吳復將樂人永樂間進士除御史陞廣東副使風裁

凜然得憲臣之體士論歸之

葉宜

葉宜南平人永樂間進士累官浙江叅政歷官盡職寬嚴適宜務與民同其好惡吏畏而民愛之

李文殊

李文殊將樂人永樂中膺薦除工科給事中有直聲累陞廣信府知府敷歷中外持身廉介布素蔬食無異貧寒及退休田里尤確然不易其素守人甚賢之

陳山

陳山字伯高沙縣人由舉人歷紹興奉化教諭召入

預修永樂大典擢吏科給事中服闋到銓擬遷廣東
布政使特留掌六科事尋命授 皇太孫經 仁宗
皇帝卽位以舊學陞左春坊左庶子尋擢戶部左侍
郎宣德中爲戶部尚書兼 謹身殿大學士 詔領
文學士日侍 文華殿充 兩朝實錄總裁官嘗墜
馬傷足 上親研藥調酒賜之高煦叛 駕親征命
由留守暨還召進齋宮命坐賜茶俄以老請致仕不
許詔免朝參命中官扶掖出入再乞致仕章四上始
俞允道卒有詩藁奏議藏於家

蔣伯良

蔣伯良尤溪人正統十三年沙尤寇鄧茂七叛勢甚猖獗王師至賊負險不肯戰無如之何伯良率民兵應之冒險力戰賊望風潰遂平總戎寧陽侯陳懋叅贊軍務刑部尚書金濂亟稱其功具以聞授建寧左衛指揮同知

黃琛

黃琛將樂人正統初進士除戶部主事陞郎中嘗奉詔賑饑淮北區畫條悉全活者十萬餘人擢江西叅政雖政務煩劇而佐理有道化成事集遷本省布政使會洞寇猖獗琛率師直擣其壘俘馘之餘黨悉平

陞南戶部侍郎德威在人爲當世所推重後巡撫四
川專以求民隱情黜陟爲已任不憚險僻偏州小邑
躬自涉歷有所陳白悉報可以勞勩故多病感上
恩遇未敢言去卽奏乞歸展省未得而病卒年六十
有一琛外和內剛寡交與善臧否人物率多奇中至
今人尚傳述之

林同

林同龍溪人天順庚辰舉進士授戶部主事出納惟
謹歷員外郎郎中累陞浙江叅政督理糧儲均賦恤
民浙人德之後轉廣東布政使爲政務存大體節省

冗費與民休息致仕歸及卒之日家無餘資

劉璋

劉璋字廷信福建南平人天順丁丑進士由戶部主事郎中陞山東叅政浙江右布政使未幾轉左成化二十年陞右副都御史總督漕運兼巡撫鳳陽等處鹽法馬政多規畫會河洛饑截漕米八十萬石由河入汴以濟之璋區畫巨艘募舟人習河勢者親督以往來畢達民得免於死亾踰年改撫治鄖陽尋改巡撫四川時刁農等寨夷人負險絕糧道璋督將領討平之播州宣慰使楊輝庶子友謀奪嫡弟受官以反

誣之璋借刑部侍郎何喬新驗治得友好奸狀竟裁以
法二十三年召入爲工部右侍郎弘治二年改戶部
四年陞左是年冬陞南京禮部尚書七年召入爲工
部尚書又三年連疏乞休加太子少保致仕卒葬祭
如例璋性行端方舉止疑重所至勤於職事在山東
江淮四川連遭凶歉賑濟皆盡其力多所全活及爲
九卿慎靜得體歷官四十年旣歸敝屋蕭然衣食僅
給泊如也璋歿無後聞者惜之

羅明

羅明字時昭南平縣人成化丙戌進士拜河南道監

察御史初奉

勅清理浙江鹽法均徭戢橫權豪歛

跡繼巡按廣西適有

內批命鎮守少監黃泌貢其

地之所產禽鳥明奏止之行部所至憲度嚴整首汰

其貪吏之尤者境內肅清還掌道事會冢宰員缺朵

順者衆遂率同列上疏謂宜公議推舉必得才德兼

茂聞望素著方可委任若授之匪人所關不細由是

奔競少戢京城東直門災 朝廷範白金爲真武像

遣中黃門送武當山崇祀以彌災變明復率同列上

疏以爲徒費財擾民而無益於事又因災異迭見率

同列陳言修省因及

鑾輿游幸南城西海賜賚無

度非敬天彌災之道也時有大臣以賄罷而夤緣復進者又有近倖越例奏請得錄其幼子入監者又有方面以考察被汰而妄訴屈抑得復職者明俱率同列奏乞追寢前命時論躉之遷陝西按察司副使奉勅撫治漢中漢中多深山茂林爲逋逃淵藪明奏立白河縣以安輯之尋以嵩洛竊發銀鑛因誣逮平民論死者四十餘人明爲辯雪者三人而已俄遷本省按察司使值歲旱饑人相食明力求所以拯濟之法無所不至仍條救荒二十事上之多所施行活人甚衆遷雲南左布政使明以其地去京師最遠

民夷雜居爲政務從簡易不事苛擾論者以爲得體
未踰年擢都察院右副都御史奉 勅巡撫甘肅其
地卽古河西五郡也控引西域流沙諸部落番胡叅
錯號稱難治明居陝日久稔知其宿弊首奏罷貢獻
以息橫歛復奏奪勢家所擅草湖之利以還軍士他
如均水利清兵馬蠲逋負多所建明其於學校風教
尤盡其心嘗奏 請增貢額以振淹滯又選秀民著
錄庠序以教養之先是甘肅祭先聖率用俗樂明至
命所司講求禮制備古樂舞器服而演習之八音旣
諧奏以奉祭邊方之人至是始知有雅樂而一洗前

日之陋弘治己酉東路有小警且有詔錄囚徒明舊
苦中煩疾至是以勞復作遂卒卒之後旬月 朝廷
以其有區畫哈密之功降 璽書褒獎尋以工部右
侍郎 召還而已不及矣明爲人外和內剛歷官二
十餘年清介謹慎始終一致人未嘗見其過舉云

陳 真

陳真字思誠將樂人由太學生拜饒州府判轉安慶
陞知揚州府政尚平恕不事鞭楚於貧民尤加存恤
歲旱跣足自罪以禱雨雨隨霽時稱有古循吏風性
尤恬淡寡嗜慾居官常種蔬以自給云

王旒

王旒將樂人由太學生知萍鄉縣廉慎公正興學獎士尤急於惠民民德之時增置一丞以專賦稅旒疏其職冗且爲民病奏革之秩滿遷西城兵馬指揮

楊丹珉

楊丹珉字德玉尤溪人由太學生知永新縣興學校賑窮乏抑強暴不數載民皆悅服先是邑有舖長謀財殺商人住舖者誣逮甚衆丹珉至訊鞠之遂得其實出屍田禾中乃抵罪衆被誣者獲免歲旱禱雨輒應蝗起不入其境後移溧水終泰州同知俱有治績

吳謙

吳謙尤溪人以明經舉除山東道監察御史調知湖廣武昌縣縣有守禦千戶所千戶周頤挾勲舊虐民謙劾奏之尋卒民德之有挽以詩云一封朝奏動雷霆死後精忠貫日明惟有武昌縣下水千年嗚咽爲先生

李勝

李勝字仲質南平人以楷書薦預修永樂大典書成願就養務期發身科目已而中鄉舉授無爲軍判官蒞事公勤崇儒術布惠政民德之肖其像祀於李冰

祠

温儀

温儀字仲威將樂人由舉人除温州府推官廉慎善治獄會平陽葉八反儀率土兵攻破夾嶼山入賊壘斬獲幾三百人還所俘平民男女百八十餘人既而泰順徐懷思復叛儀直搗巢穴斬獲甚衆擒懷思并其黨三十餘人巡撫尚書孫原貞以聞進五品階秩

林埜

林埜南平人正統末著錄郡庠沙尤寇起蔓延隣邑

蓋自陳効力率民兵往戰至建寧高陽里遇賊鼓操
而前俘渠魁謝保大黨一百八十餘人斬首六十餘
級所至克捷事聞授尤溪縣主簿陞廣東布政司經
歷

補遺

廖文昌

廖文昌字克盛福建沙縣人永樂十五年舉人十八
年由行人選山東道御史巡按廣東廣西燁有風裁
因劾鎮守太監袁禎謫星子縣典史陞東阿知縣致
仕

胡瓊

胡瓊字國華福建南平縣人正德六年進士由慈谿知縣選山西道御史告病起補巡按貴州丁憂復除山西道議禮杖獄卒

田一儁

田一儁號中台福建大田人隆慶戊辰進士改庶吉士歷官祭酒陞禮部右侍郎尋轉左兼侍讀學士教習庶吉士卒于官一儁爲文順理成章不加點竄自成大雅其人亦翩翩塵外無所依傍而自成一家云

福建汀州府

謝柱

謝柱寧化人元季從太祖皇帝渡江討陳友諒繼奉旨從宣德侯取雲南諸路屢見功蹟授武略將軍洪武二十二年除青州右護衛指揮僉事累陞福建都指揮使賜名玉柱嘉其忠勇復官其次子賜授福寧衛中所副千戶季子希彥輔駕散騎舍人

伍清源

伍清源連城人博學善詩文國朝洪武初郡辟爲儒學訓導與諸生講解昕夕不倦一時士子爭欲授

業於其門洪武十三年郡守楊大得以清源應明經
舉授寶鈔提舉司副使後以疾告歸自號秋圃構軒
於後龍山之陽環植花木日以詩酒自娛年八十九
卒

丘子瞻

丘子瞻永定人以學行名洪武初求山林儒碩子瞻
年五十餘知縣劉亨以明經薦授武平訓導晚歸林
壑以觴咏自娛清名雅望人敬仰之祀於鄉賢祠

周子禮

周子禮上杭人富而好義洪武間鍾子人等寇縣民

皆欲奔避無肯捍禦者子禮挺然告衆曰有能敵賊者當罄家業賞之時張愛爲民丁隊長偕其侶梁文處率所部以應子禮與之誓斷左手食指以示信衆皆感奮爭先賊敗子禮遂出白金分賞金盡又出其家人首飾以繼首飾盡復出其布帛器物以繼又盡乃曰願以田產立券給賞城中有缺食者仍出米粟周之民恃以安而縣治亦賴以無虞

張顯宗

張顯宗字明遠福建汀州府寧化縣人洪武辛未進士及第授翰林院編修有孝行從政通敏陸太常寺

丞參拾年秋七月命署祭酒事已與禮部增定監
規顯宗與司業韓克忠率生徒陞見上戒諭諸生
曰昔宋訥爲祭酒嚴肅善教以故朝廷得人近年
老儒爲祭酒學規日壞生徒全不務學用之僨事今
署事者增定規條敢有抗違奏聞重治若有似前貼
匿名帖誹謗師長者梟首監前徙家煙瘴著爲令是
時顯宗首疏便益數事申明學規綱紀一新拾一月
顯宗以違限監生李從新等二百一十七人比例擬
奏以聞復定四川兩廣福建過一年之上北平山西
陝西湖廣半年之上浙江山東河南江西五閱月之

上直隸三閱月之上皆發充吏禮部奏聞發遣其限
外不及一月有患病文憑者送監免問已而禮部據
監生傅崑送幼子還鄉魏文禮畢姻皆劄付本監照
例定限行之是年本監以坐堂人少誠恐諸司再取
辯事不敷移文禮部及聞於上今歲貢照二十五
年例於是入監遂衆三十一年春正月顯宗以違限
監生龍友諒等二百二十人依例分豁以聞上曰
是皆無志者雖使讀書亦不成矣命吏部銓除遠
方典史以困役之秋七月顯宗真拜祭酒奏請開通
成賢街正路分布號房從之三十四年奏言監生違

限有三年之上者例得典史故逃曠自恣乞懲之
上命仍充吏役三十五年正月陞工部右侍郎往江
西招集丁壯募民出粟夏六月復爲祭酒 文皇帝
卽位顯宗與司業張智皆歸附庚寅謫戍興州以建
文中嘗募兵江西爲軍卒執告故也永樂五年起爲
交趾左布政使勞來撫綏克盡其職永樂七年卒於
官顯宗操心誠篤處事公平在交趾民懷其德建祠
祀之性尤聰明讀書過目成誦奉 命選述有諸司
職掌逆臣錄忠義錄等編及立大學規制

張愛

張愛上杭人膂力絕倫洪武二十年盜鍾子人同廣
寇作亂凶鎗可畏衆推愛爲隊長以備禦之及子人
攻縣愛挺身與龍文處等力戰殲其渠魁斬首數百
級賊敗而退復隨官軍進剿深入被執罵賊不屈而
歿民哀念之祀於赤岡廟題曰勇士張愛之神

胡時

胡時永定人忠厚淳良以明經教授於鄉善吟詠尤
工楷書洪武間知縣劉亨薦授杭庠訓導教人必因
其材質高下而授之多所造就卒於官今祀於鄉賢

祠

沈仲繼

沈仲繼連城人中應天鄉試永樂初累陞吉安府知府先知山西應州有文武材彌盜安寧地方寧緝

巫章瑤

巫章瑤清流人永樂間歷官建昌知縣嚴明立政廉介自持至今建昌稱德及民者以瑤爲最他令不能及也

羅經

羅經上杭人永樂戊戌進士筮仕淇縣知縣廉潔持身尤重農事嘗教民以桔槔溉田至今民受其利擢

御史彈劾不避權要人多忌之陞浙江副使執法明允德惠及民

范金

范金上杭人性沉靜寡言從王盧淵授春秋學博才瞻永樂癸卯以經義甲一道正統間典始興陵水二庠教既而以疾歸養二十餘年士子樂從者衆卒人咸以位不稱才惜之

張子才

張子才寧化人讀書敦行永樂間舉茂才不起隱於邑之張豪坑課子孫耕耘爲業家用以裕景泰中知

縣梁昂援故事勸其納粟賑濟以膺冠帶之榮子才
毅然出粟二百石以輸廩且曰出粟救荒富者當爲
事耳况躬逢 盛治得以優游安居爲太平民幸衣
食既足自當推其有餘以周貧乏何敢望冠帶之
賜耶固辭不受享年七十具深衣而卒鄉人咸
歆美之

賴世隆

賴世隆字德受清流人宣德五年第進士爲翰林院
編脩正統間沙尤寇發世隆自乞協同寧陽侯討賊
鄉邦賴之

王英

王英長汀人宣德中任戶部主事尋陞員外郎山西布政司叅議終左布政使所至皆有聲致仕卒

馬馴

馬馴字德良福建長汀縣人正統十年進士授戶部主事遷郎中陞四川布政司右叅政進布政使擢右副都御史巡撫湖廣致仕卒於家賜祭葬如例當馴爲叅政時分守地方適有寇亂嘗督理餉饋不缺事平受文綺之賜繼爲布政值有事於播州給贍軍需復賜璽書褒獎至巡撫湖廣關中饑民流食荆襄者

甚衆馴以便宜卽賑之地方遂賴以無虞後歸老於家凡十有二年而卒

劉敬

劉敬字謙之上杭人早失怙事母吳氏至孝凡得食必以遺母正統己巳沙寇攻縣甚亟家人悉驚竄惟母在室時年八十有二敬度不能行誓死弗離乃負母出城西奔二里許賊追及之箠楚索金杖及於母敬抱母號天乞免母因傷病不能興敬含哺以飼賊退貧甚日採拾以養母卒哀毀踰禮至今人稱其孝

江瀚

江瀚上杭人著錄邑庠正統己巳沙尤寇發瀚避巖
將至郡城被執盜詢知爲儒生強欲用之瀚曰朝
廷養我有年未能效報豈可從你反耶賊怒摔近城
下脇之使跪瀚不屈罵不絕口遂被害賊大聲告城
上人曰此上杭江秀才也人咸義之

鄭瑤

鄭瑤清流人爲縣刑曹掾景泰元年草寇復發攻掠
鄉村民駭竄至楊梅逕路狹人莫能進賊數十追及
瑤挺身與之戰自午至申賊亂鎗傷其胸瑤悍然不
顧賊畏其勇而退瑤亦力疲倚巖石僵立而死徑中

之民四百餘家悉賴保全

張秉和

張秉和上杭人天順六年溪南寇發秉和被執令之跪罵曰我良民豈跪你賊耶欲殺之傍賊曰你跪可免死秉和復厲聲罵曰死強盜你等爲此不道恨不噉你血殺卽殺矣跪何爲遂遇害

俞瑤

俞瑤清流人任青田知縣十有五年勵精爲政清慎廉能興學校重農桑善政及民民愛戴之卒於官民立祠祀焉扁曰石古廟以瑤之德如石之不朽也

丘弘

丘弘上杭人天順甲申進士除戶科給事中時淮揚大饑弘奏賑恤之民賴以生仍陳時政十一條上嘉納之明年地震又請修德弭災條上七事上亦俞允陞都給事中

吳海

吳海上杭人富而尚義成化己亥冬溪南民標掠其鄉流移者衆海惻然散粟濟之明年春賊復發海仗義率民兵擒斬賊首鍾三等若干人戰於峽頭之麓已而賊潛伏發於中道海遂遇害鄉人至今懷之

張彥銘

張彥銘寧化人領鄉薦歷任判府乞致仕家居終養
崇正學憎俗流惡佛老歸鄉三十餘年非公事不至
公門動必由矩度號素庵老人年九十七弟彥正性
孝友少時母疾甚刲股醵天求以身代母疾果愈咸
謂孝感所致既長讀書善吟咏進脩不倦年九十號
華山隱叟彥隆號遜齋慈祥敦厚樂善好施與邑人
以鄉先生稱之年八十有七歲行鄉飲兄弟迭爲大
賓座人皆服其宜知縣鄭瑄命工繪其像爲圖屬詩
入歌咏之號曰寧陽三老

人物考卷之七十四目錄

福建興化府

方槐生

林圭

吳源

林士敏

陳繼之

陳宗孟

楊慈

方鯉

陳用

余耀

林環

林長懋

黃壽生

陳中

林文

黃諶

翁世資

陳俊

何誠

方澥

柯潛

方守

彭韶

鄭紀

陳音

楊琅

黃仲昭

黃璉

周瑛

宋端儀

林元甫

黃乾亨

林俊

鄭岳

陳茂烈

黃鞏

方良永

馬思聰

陳騰鸞

魏一恭

陳言

郭應聘

柯維騏

補遺

林祥鳳

周彥

林誠

陳仁

李廷梧

林有孚

林文俊

張日韜

陳琳

鄭一鵬

朱澗

鄒守愚

林潤

鄭茂

福建邵武府

譙賤生

龔仲賢

何道旻

蕭永泰

吳琬

花潤生

吳璽

張誠

上官祐

朱祐

曾真保

余隆

黃原昌

黃昌

黃孟舟

陳泰

鄒允隆

李剛

徐溥

謝嫌

余志

朱欽

陳讓

本朝分省人物考卷之七十四

福建興化府

方槐生

方槐生字時舉初名樸莆田人通春秋詩書三經善講說爲文詞元季辟學官不就與同邑諸人士結壺山文會洪武初薦充興化府學訓導嘗修莆陽人物志起唐貞元終元迄錄未成書而被誣以卒今存於世者僅名臣一類不及三卷

林圭

林圭莆田人洪武初以明經薦爲本邑訓導陞寧州

教諭凡六典文衡晚年致仕家居講學明理啓迪後進經學詞章爲莆郡首稱

吳源

吳源字性傳興化府莆田縣人早孤自知力學惇禮好義學士大夫皆推重之至正末舉泉州路路訓導洪武三年復以明經授興化府教授十三年中書舍人林廷綱薦源德行特詔徵之於是與杜敷龔敷趙民望李佑俱應召至命爲四輔官兼太子賓客位列公侯都府之次屢降制諭欲其均調四時繼令各司春夏季上中下旬而源則司夏季中旬每講明治政必

以得賢才敦教化養黎元爲圖治之本甚見嘉納
上間之東苑命五人侍應制聯句七言近體一章
上先倡首句曰踞盤龍虎肇豪英五人者遂繼之曰
五色卿雲炫日明臣杜敦玉氣瑩然垂景象臣源民
風樂爾見昇平臣龔敦山河百二金陵最臣民望宇
宙千秋帝業成臣裕上復繼之曰暗憶六朝興替
事臣杜敦遂足之曰禎祥未盡又加禎詩成上呈
上喜後歸復詔徵赴京授國子監司業未幾卒於
官

林士敏

林士敏名懋以字行莆田人研五世孫父善同字舜
與少好學工詞賦元末領薦署泉山書院山長國
初例起赴京師以祖母年老辭旣而復起之竟卒於
道士敏洪武中由鄉貢入太學踰年署大理寺少卿
除刑部郎中以陳言謫南丹州吏永樂初起爲南康
府知府一意損已厚人衣服給取於家改淮安府清
介愈甚坐不防水患貶南寧府鑛鄧巡檢辟爲常州
府宜興縣教諭有芹邊集匡廬小稿

陳繼之

陳繼之莆田人建文庚辰進士授戶科給事中嘗以

江南僧道多占腴田蠶食百姓奏請稍爲限制僧道人給五畝餘以賦民從之北師南下繼之建白抗禦多肆指斥又言於朝曰徐承福燕之至親必有陰謀宜先事誅之不聽已而承福果開門降壬午六月文皇卽位召繼之責問不屈磔於市夷三族

陳宗孟

陳宗孟寧德人永樂初進士有學行知易州爲諸生時嘗上書當道罷立鹽場鄉人德之居家嚴訓戒子姓同居庭無間言

楊慈

楊慈莆田人幼穎敏下筆數千言立就其文豐贍典則直欲追蹤古作者永樂戊子鄉試第一辛卯登進士改庶吉士慈體貌豐偉志氣軒昂恒以科第文辭爲儒者末事抱負甚大未及用而卒

方鯉

方鯉永樂中進士爲監察御史風采凜然出知彰德紹興二府皆以嚴明蒞郡號良二千石正統中致仕行義爲鄉邦所推服

陳用

陳用字時顯莆田人永樂中第進士爲翰林庶吉士

預修五經四書性理大全書成授檢討丁外艱起復
留南京宣德間陞修撰正統陞侍講掌院事二十餘
年丁內艱歸卒同縣陳道潛黃約仲俱與用同時被
選預纂修之列道潛第庚辰進士授禮科給事中改
夷陵州判官永樂中召除監察御史滿九載以老致
仕約仲初以楷書選大臣有以工詩薦之者擢翰林
典籍遷檢討出爲汀州教授有靜齋集四卷

余耀

余耀字叔炫永樂中第進士除進賢知縣九載少師
楊士奇薦其賢移檄卽家命馳傳詣闕陞吉安府通

判掌泰和縣事調饒州府通判卒勤敏廉介歷官郡縣所治有聲

林環

林環字崇璧披裔孫莆田人幼聰慧讀書數遍卽成誦甫成童肆筆成章永樂丙戌進士第一除翰林院修撰明年陞侍講預修永樂大典爲書經總裁官兩爲會試考官所取皆得人十三年扈從幸北京進講經筵音吐洪亮大被寵眷卒於官年四十有綱齋集十卷

林長懋

林長懋字景時蘊之後由鄉貢歷德清南昌二縣教
諭陞青州府教授永樂中選侍 皇太孫讀書授翰
林院編修陞右春坊中允宣德初出爲鬱林州知州
以陳言下獄者十年正統初再守鬱林疏溝渠禁淫
祀撫下以恩而自奉極清儉時有都指揮陳鑑不法
長懋奏黜之卒葬桂林縣黃江口州人歲爲增土仍
建祠祀之

黃壽生

黃壽生字行中滔十五世孫永樂中以太學生試應
天第一等辛卯進士改翰林庶吉士與修五經四書

性理大全書成授檢討九載將滿考試禮闈得疾卒
自幼莊重篤孝友敦行義勤學問經史百氏多所通
貫尤邃詩經一時從遊之士多取高第爲時聞人而
莆之業是經者壽生實其鼻祖也學者因其所居稱
爲東里先生後以子嘉恩贈知縣有東里文集

陳中

陳中字舜用大卞之後永樂辛丑會試第一資性簡
率文思豐瞻宣德初自南京戶部主事召赴行在與
修太宗仁宗兩朝實錄書成陞本部員外郎年五
十七以母老致仕卒年八十三有文集行於世

林文

林文字恒簡莆田縣人自少凝重穎敏異於羣童稍長讀書思義務深沈求索凡經傳微辭奧旨人所窘惑者文卒有悟入處遊郡庠益肆於學宣德庚戌登進士入對列第三人授行在翰林院編修正統初與修宣廟實錄充經筵講官實錄成陞翰林院修撰連丁內外艱服闋仍兼舊職景泰壬申進左春坊左諭德兼修撰癸酉修歷代君鑒成丙子修天下郡志成皆有襲衣文綺之賜陞左春坊左庶子兼侍講天順初英宗復位改尚寶司卿仍兼侍讀命往河南

祀淮瀆之神還拜翰林院學士兼東宮講讀官充國志副總裁莆入國朝從無正拜學士者自文始里中榮之三年以老乞致仕上諭少保李文達曰此淳雅君子也不允所請憲宗登極進拜太常寺少卿兼侍讀學士未幾復懇辭歸老抵家傾城士大夫迎候羅拜觀者如堵又數百年所無者越三年成化丙戌卒贈禮部左侍郎文爲人神清志定充養有道燕居端處終日欽欽其經幄論說史館紀撰勞益實多行於道不游目而視與人言未嘗率爾應荅自敵已以下皆降色爲禮故人無鉅細皆深服其德器暮年

形神安康奉祭祀接賓客酬應靡倦其恭敬不減於少壯之日凡聲色華侈之好終其身不接耳目所著作平實典正類其爲人一時贈送四方碑刻多出文手有淡軒稿存於家

黃 諤

黃諤字聲叔莆田人講學家庭兄弟叔侄自相師友宣德中以明經薦授本府仙遊縣學訓導丁內外艱更無錫麗水青田三縣學訓導天順中以教有成績陞廣元縣儒學教諭廣元爲蜀北鄙軍士荷戈而立編氓鮮少學久廢師生倚席不講諤來以義倡率廣

元人士廣元人士翕然趨之乃相與修學舍建文廟
塑聖賢像每日衣冠坐堂上呼諸生使前授以經書
背誦覆講如法其教舉子業務識體裁不剽竊陳腐
諸生苦貧無資以爲學曰汝第爲學吾當思以給汝
乃察其貧甚者解衣推食以授之諸生至爲泣下其
或恃財怙勢不循軌度則嚴呵之呵之不從施以榎
楚務從善乃止既歸卽學宮旁立祠肖像以祀嘗聞
在仙遊時知縣王彝以白金二百兩寄謁呼其子授
之人服其義在麗水時浙寇張甚衆以饒有材略推
以捍賊部署既定乃諭以忠義衆感激效死鼓之而

進賊奔北境土以平人服其勇其人旬時與僉事董應珍同時濟江董船覆呼近岸諸小舟莫肯前諶曰是欲得財耳乃自取囊中金分授之衆乃亂流而渡董獲免人服其仁且知處事之變

翁世資

翁世資字資甫莆田縣人父瑛舉鄉貢官至翰林檢討掌國子監助教事累贈戶部尚書性喜酒樂易姻黨無小大咸恩視之世資幼穎敏自其遊鄉學時器識已如老成人侍父官京師因乞入太學正統壬戌進士授戶部主事政暇輒繙閱舊案究其利弊涉獵

廣記且明習國朝典故凡條例因革悉所諳練大爲部堂諸卿佐所敬禮嘗以部檄往通州監收軍士冬衣布花因奏言所收貯庫藏轄於通州諸衛宿弊極多宜改屬有司則其弊可革從之丁外艱歸景泰改元本部尚書金濂以時方多艱求可以裨謀議者因奏起復世資固辭終制明年服闋復除戶部遂委世資專典各司章奏有大議必與商確未幾陞署本司郎中適江南水災部以屬世資勘驗因奏免應天太平寧國安慶廬州等府及建陽宣城等衛稅糧五十萬餘石芻束倍之且檄所司賑恤英廟復位改天

順之元年充會試同考試官時大臣多罷上謂姚夔翁世資俱可大用遂擢夔禮部世資工部俱右侍郎三年命往淮徐督運大木回內織染局上言先遣官往蘇杭等五府提督織造上供文綺七千疋未完今計各項賞賜等用又合別遣官督併加造七千疋世資謂東南水潦民苦艱食宜當樽節以甦疲困與尚書趙榮左侍郎霍瑄議減其半榮瑄皆有難色世資曰倘得罪某請以父子三人當之疏進上疑其要譽推主議者下世資錦衣獄貶知衡州府先是郡有疑獄數十人世資悉爲直之治郡汲汲以革宿弊

厚風俗爲務新廟學修石鼓書院置便民倉凡郡政所不可少者皆以次修舉衛師有不循理法者世資稍抑之遂誣世資怨望逮至京師上不直衛帥削兩階調任復世資官成化元年陞江西左布政使適廣東寇發王師南下有獻計欲令江西轉餉計當用十萬人世資議齎銀就廣中糴穀以餉民以不擾屬大旱軍民多轉徙乃大發倉廩賑之且爲奏蠲民賦百七十餘萬石仍免一應雜泛差科境內以安五年陞都察院右副都御史巡撫山東明年秋東土大饑世資日夜講求荒政發廩勸賑復遣官分道賑恤民

賴以濟八年遷戶部左侍郎十三年奉勅提督京通等處倉場明年進本部尚書職掌仍舊十七年召堂部事世資久處計司財賦出入劑量盈縮罔不懸念事宜十八年以年及再上疏懇求去遂加太子少保致仕行至儀真卒年六十九贈太子少傅遣官諭祭營葬世資居官四十餘年謙約和厚善兄弟廣交方家無餘貲所著詩文有兵崖集若干卷

陳俊

陳俊字時英莆田縣人正統丁卯鄉闈第一人明年戊辰進士授戶部主事值父卒解官迎喪海南富土

物一無所取服闋仍除舊職景泰甲戌差督天津諸
衛官兵舊欠採秋青草卽上言採取舊有額已難徵
辦况歲徵耶漁不可以竭澤朝廷是之得減歲增之
數三十五萬束蘇松諸郡折糧銀爲里豪所侵者七
十五萬兩有奇俊往徵之不數月悉輸納內帑尚書
金濂大咨異之俾典闔部章奏自是更景泰以至天
順歷任員外郎中職皆嚴辦而賢能之聲日起至辛
巳朝廷出師征兩廣叛寇命往督餉時郡邑殘破公
私匱乏百方籌畫事克有濟如弛鹽商越境之禁俾
隨處貿易而每引輸粟二斗於南雄梧州用是兵不

乏食而民不出賦輿論稱之是冬母喪乞守制不許
明年師還始歸莆總兵監軍合百金爲贖却之又明
年復任成化元年陞南京太常少卿四年召爲戶部
右侍郎時尚書楊鼎以剛悍自任不假貸於僚佐然
獨重俊事經俊裁斷者卽不復省屬時四方奏災異
三邊告輸輓文移沓雜諮議旁午裁決如流不淹晷
刻而靡不曲當人咸服不可及辛卯京師饑俊奉勅
發太倉粟一百萬斛減價糶以利民權貴有乘時射
利者俊請於上凡糶以升斗計滿一石者閉不與
其計遂沮而饑者獲濟壬辰上命將北征特勅總

督軍餉於秦晉諸邊俊倍道疾馳比至則邊庾空竭
歲且不登芻粟價湧而榆林延綏糧道險遠輸者病
之俊乃發金於內郡市易且修西安韓城同官徑道
以便飛輓而行所向無敵虜酋授首勞伐居多凱旋
加俸一階九年遷吏部右侍郎十一年轉左銓綜人
物號爲清允十三年滿九載陞南京戶部尚書十六
年奉勅改兵部叅贊機務剷除宿弊益不動聲色而
事皆就緒人稱爲名德老成二十年改南京吏部尚
書二十二年加太子少保致仕弘治元年以疾卒於
家謚康懿俊爲人沉毅簡重淵澄山峙望而知爲正

入平居篤孝友寡言笑操履端方確乎不可拔既仕以清白自持雖位至六卿蕭然不異布衣時世多敬服其介云

何誠

何誠興化縣人正統間由太學生任鳳陽府虹縣知縣廉正愷悌不尚威嚴每詣村落教民築堵植桑民久賴其利後以疾卒囊橐蕭然虹人共買棺殮之妻南京人舁其柩於父家卽葬虹人思之遷柩還葬於縣之山川壇右復建祠祀焉

方解

方澥莆田人正統間年五十餘始第進士授行人懇
求致仕去性介烈抱經固窮以講授爲業未嘗輕入
城府晚年尤邃於學動止語默不少苟學者稱爲柳
東先生

柯 潛

柯潛字孟時莆田縣人生有奇質穎異絕人數歲能
作詩正統甲子領鄉薦當赴會試以未忍離親遂入
蓮峰僧舍講讀不輟景泰辛未登甲榜進對大廷賜
狀元及第數日授翰林修撰潛丰神峻整言動謹飭
是時翰林諸老咸愛重之未幾賜五倫書五經四書

尋用薦入經筵壬申四月陞右春坊右中允兼修撰
五月預修歷代君鑒書成賜白金文綺甲戌預修寰
宇通志書成陞司經局洗馬仍兼修撰加賜白金文
綺是年典應天鄉試舟泊淮揚有鬻私者暮夜投潛
以所賂遺置舟中潛怒執付有司治以法是科場屋
肅然咸稱得人 英廟復辟更授尚寶少卿兼職如
故乞許歸省己卯 命修玉牒庚辰春 命偕呂學
士原考會試十二月 命充東宮講讀官尋給誥命
進階奉直大夫癸未復 命偕陳學士文考會試會
場屋火罷甲申 憲廟嗣位以隨侍恩陞翰林院學

十三月有旨選進士年少質敏者李東陽等十八人入翰林爲庶吉士命教以古文詞學八月上御經筵勅兼經筵官仍賜白鏹文綺復奉旨纂修英宗實錄成化改元八月考順天鄉試九月玉牒成再奉旨教習庶吉士林瀚等二十四人尋命掌翰林院印丁亥實錄成陞詹事府少詹事兼翰林院學士賜白金織綵段賜宴禮部戊子二月命日侍經筵講讀自辛巳迄戊子凡遇午節輒賜牙骨聚扇上有御製清暑歌解愠歌及諸家繪畫金織扇袋五色圓壽絲縷虎頭縑畫文虎七月有詔議慈懿皇太

后山陵事潛率僚屬進論合葬於禮爲宜論可其奏
十二月賜經筵儒臣七人襲衣冠履潛已聞父喪
上命卽其家賜之旣而有司爲少卿公請祭命并
與葬蓋異數也潛感激銜哀就道抵家不入中門寢
苫枕塊不脫襟帶擇地於其所居之東一里許葬和
溫山麓不忍離喪次事母戴宜人備極甘脆己丑季
弟澍病親爲調藥比卒殯殮皆從厚朔望易期服哭
失聲而後返衣衰居苦次庚寅戴宜人卒哭慟絕而
復甦朝廷復遣官諭祭辛卯有詔起復時祭酒缺
員難其人上起用之以厭士論潛聞命具疏乞終

制大略言忠與孝豈有二致事君事親初無兩心使
親喪可短則他日所以事君者可知矣 上覽疏許
之初潛素無疾至癸巳八月久居苦塊患左足風痺
寒熱繼作自知不起呼弟江與之訣瞑目而逝訃聞
祭葬如制潛稟氣峭直操行耿介發爲文章嚴整有
法其爲詩清新微婉尤有風致時偕二三知己窮覽
勝槩雅歌投壺分韻賦詩襟度豁如也至於遇事感
發言論侃侃揚摧古今毅然自負雖在庶僚已繫天
下之望然雖以聖賢之學日啓沃 聖心而平生蘊
抱未及少施於天下故其歿也士大夫多傷之

方守

方守字宜約號省菴莆田人由進士柔和孝謹方上
春官母王微恙卽解裝待藥久之果不起其父訓以
廉慎之詩昕夕佩誦聲色澹若不立媵婢兄弟族里
非甚獲戾咸曲加容納問學經義尤精嘗提調雲南
議閱詩與主司連合十二卷其後稍叅伍率在取列
延綏響馬盜至從者恇怯守厲聲曰吾方郎中也盜
引去方議事城戍報急鎮巡錯愕守曰第先之虜驚
遁平居若無能爲其應猝計類此旣致布政事舊業
日落貸於里富人爲常人曰二品官如是耶相傳爲

笑林俊作憐白頭寄之事頗聞蒲二庠士言之巡按御史援詔例給廩又給田薦之朝未報守疾作強力序族譜以不及置義田爲恨弘治甲子四月十八日卒

彭 韶

彭韶字鳳儀莆田縣人天順丁丑進士除刑部山西司主事未幾丁母憂服闋陞廣東司署員外郎時張岐以外臺擢右僉都御史協管院事韶以其人非才力著望論其不可願朝廷收召王竑李秉葉盛以伸公論疏入下韶獄都給事中毛弘等言韶持論雖過

心實懷忠得宥復職尋進本司郎中廣東爲司繁劇
挾勢席寵者動有所挾詔獨屹然不倚雖羅咎無所
恨外戚周遵與畿內民爭田願得內臣及錦衣衛官
往勘踏丈會有旨命法司官以行衆咸推詔至則環
視周匝徑歸自劾奏曰田本民有雖其戶報不及管
業然地有高下歲有旱潦細民頻年出賦以給公上
早則資汗下以補高仰潦則資高仰以裨污下安有
空閑可以別給以民田給貴戚恐以重傷國本復下
詔獄科道交章言其無他得釋庚寅陞四川按察司
副使所至平冤滯黜奸蠹敦風俗恤民隱壬辰冬分

巡川東道發奸摘伏每出巡郡邑民爭挽肩輿冀先
至其境乙未陞按察使詔之副憲也凡有淫祠在分
司者悉去之至是以二門外有廟祀五顯其事不經
趙清獻公遺愛在蜀清風鐵面正吾憲臣之事乃與
同僚謀撤五顯像而設清獻神主錄朱門問答有及
時政者名曰政訓以自警且以勵僚屬在蜀恩威兼
著淑慝自分廉而不激明而不苛蜀人懷而畏之至
今數賢廉訪必首稱焉戊戌陞廣東左布政使下車
首進父老百十人問民疾苦與利弊所當興革者而
施行之先農民補吏率多重費詔曰取其財而責以

不貪可乎選俊秀善書者充之而積弊遂革鎮守內
臣歲有進貢之儀里胥乘之求索多方民不勝擾上
疏言自古明王不寶遠物廣東民力竭矣守土臣以
此事上爲恭不知凋傷國本遺害反大監舶內臣革
眷請以均徭餘剩六十戶隸舶司爲造辦貢獻之需
又疏言今之官民富强不及於昔及今十分愛惜加
意樽節猶恐無以爲繼况又重他端而益以雜用其
何以善後願將眷所奏餘戶暫與一年以後遞年停
罷有詔減其半陳獻章公甫以學行有聲特薦於朝
獻章醇儒未見收用恐國家坐失惟善之寶凡廣南

名士皆折節下之每於朔望受民詞決斷如流告戒
諄諄如召子弟而督訓之至有不平輒取見詔而自
去者最後太監梁芳弟錦衣衛千戶某在鄉國私採
禽鳥等物進貢官民俱罹其害復上疏言狀忤旨調
貴州布政使濱行之日廣之父老涕泣河下如去慈
親追送數百里外者若干人蒞貴藩竟九閱月用太
宰尹公旻薦擢都察院右副都御史巡撫蘇松嘉湖
等處聲稱凜然而鎮之以靜不尚擊搏吏自不敢犯
科民益樂其愷悌乙巳召爲大理寺卿未上論鎮守
內外等官貢獻非宜道改右副都御史巡撫順天等

處兼整飭薊北軍務陳時政以彌天變議糧運以便
軍民多切時宜迨孝宗登極臣僚交章論薦召爲
刑部右侍郎屬浙西不靜承詔巡視至則誅厥渠魁
數人而劾罷守臣一方晏然弘治元年戶部言兩浙
鹽法久壞命以本官兼左僉都御史留治之詔早
夜講究利病所在而叅伍其說以浙西通舟楫鹽利
多於浙東而浙東亭戶抑配尤甚因定其折價銀之
輕重及處州等處課額宜殺凡便宜事數條奏行之
又憫煮海之氓貧苦以其山場草蕩晒淋煎熬折閱
征陪之狀略分八節具圖以達三年轉吏部左侍郎

時三原王公恕爲尚書得詔爲貳皆不避權貴請謁路絕人服其公庚戌冬彗星見於天津 詔大臣言

軍民利病時政得失具言軍民利害曰厚根本曰減役錢言時政得失曰正近侍曰慎官爵終篇又言自今午朝乞與內閣暨六部大臣面議經邦急務 上

嘉之壬子陞刑部尚書數日 命侍經筵詔掌刑憲

務明慎而以忠恕爲本遇有骨肉相殘者輒憂形於色曰是吾之刑罰不足以止奸也性素鯁正貴戚中官往往爲之斂手時安遠侯柳景總鎮兩廣都御史秦公紘發其贓貨鉅萬事聞時抵景於法奏褫其爵

景挾戚畹於內降欲以破公議之是非擠秦於危地
仍執奏不易 朝廷不從復下大臣廷議竟亦如韶
言其後景賊銀追及八百兩有 旨免其餘欠復言
陛下優待貴近之臣如此臣等忝列守法之官不宜
阿順以圖自便景應追賊數十未及一乃特蒙恩盡
行蠲宥其如物論何疏入不從左右有不樂韶所爲
者摘官屬細過以怵韶而伸已志韶坦然任之終不
爲所疑沮會亢旱求言復因事納忠條陳四事皆時
所難言者先是以疾在告上疏乞休 上勉留再三
仍令支俸在家調治韶方以素餐自劾而 上眷益

隆近臣督官數命來視是年六月疏復三上 上命
乘傳以歸以乙卯正月卒年六十六贈太子少保謚
惠安韶天資粹美涵養深厚色和貌溫而嚴毅果敢
之氣自形終日端坐繙閱經史聞人片善則必紀錄
服食器用不求鮮美玩好之物泊然無所動於心與
之居竟日卒未嘗見其私喜愠在官守處事精明馭
吏嚴整事無巨細必以身親視國事如家事視民疾
苦如已身暮年名德益尊而其自處退然如無所有
以故聲名重海內云所著有名臣贊錄三卷續修莆
陽志十卷在蜀有成都志二十五卷在吏部有天曹

日記差祀恒山有北岳代行稿爲尚書有永臺錄平生雜著詩文名滯稿總若干卷奏議一卷

鄭·紀

鄭紀字廷綱仙遊人天順庚辰進士改翰林庶吉士授檢討 憲廟登極獻太平十策尋移疾歸踰二十一年再起供職陞浙江副使提督學校弘治二年召爲國子祭酒會萬壽節修齋醮禮部預取監生供事紀以爲不可上疏諫不聽改南京左通政陞南京太常寺卿南京戶部右侍郎久之進本部尚書致仕正德三年十一月卒年七十賜祭葬如例紀姿貌英特氣

象方整爲文章條鬯而尤以用世之學自許其爲提
學時正樂舞行鄉射毀淫祠皆有裨風教旣調官南
京猶數言事 上在東宮行冠禮紀采自文王以來
嘉言善行凡百條各繪圖作贊名曰聖功圖以進在
戶部尤多建明皆關錢穀大計

陳音

陳音字師召福建莆田人天順甲申進士改庶吉士
爲人古貌古心於世故細碎米鹽筐篋殊若無所幅
尺遇人無貴賤賢愚輒傾蓋居官三十餘年外若渾
夷胷中是非輕重涇渭甚辨與人交際錙銖不爽潤

大事有不可必如其志自羅倫王徽等貶斥中外結
舌以言爲諱成化乙酉音爲編修上疏曰竊見近年
災異屢見雨暘愆期翰林論思之地也臣敢不竭其
愚臣觀春秋二時 陛下雖間御經筵以講聖學然
勢分尊嚴上有所疑未嘗問下有所見不敢陳願於
退朝之暇擇一二儒臣有學行者引對便殿少霽天
威有疑輒問務使 聖心渙然而止方今人才日降
言路日塞異端日熾宜召還致仕吏部尚書李秉修
撰羅倫編修張元禎評事章懋給事中王徽新舉人
陳憲章置之臺諫革去法王佛子真人位號禁止創

建寺觀則正人用言路開妖妄息不報司禮黃賜母
死省寺監院無弗弔祭翰林獨未之請也一日徐侍
講瓊言於衆日時且如此獨得不往乎衆或應或默
音忽奮然大怒作而言曰堂堂翰林相率而拜內臣
之門天下其謂何斯文其謂何詞氣憤激聲淚俱下
於是言者大沮事遂已汪直之在西廠也氣燄烜赫
出沒如鬼神一日有校士突入兵部郎楊仕偉家收
縛仕偉拷掠及其妻屬衆駭莫敢闖焉音其隣也登
墉呵之曰爾何人敢爾不畏國法其人曰爾何人敢
爾不畏西廠音曰汝欲知我乎我翰林侍講陳某也

聞者爲之縮頸劉文穆之起復也音自南京與書止
之文穆不悅其後當路有缺吏部擬音文穆輒沮之
曰其腐儒也不可用音由進士改庶吉士授編修成
化十三年進侍講十九年擢南京太常寺少卿弘治
三年署南翰林院事六年乃進卿七年卒於官爲文
典實有理致尤邃於經學四方舉子質經填門塞坐
得一語人人各厭其意平居恂恂語若不出口至其
疏時事叱邏卒排衆議何其壯也於乎其篤行君子
者乎

楊 琅

楊琅字朝重莆田人第進士爲河南道監察御史拜
官方閱月會 憲宗皇帝初郊還宮外人頗傳有貢
獻者希進琅上疏言宜用賢修德以永天休疏留中
不出繼言尚書王竑有太節不宜使在散地修撰羅
倫給事中王徽等坐言事去國願召還以開言路又
嘗與同官陳選劾罷大臣不才者數人時稱琅爲敢
言御史風采隱然動縉紳間出按江西浙江二藩靜
重不苛陞山東按察司僉事尋命提督學政卒於官
士林惜之

黃仲昭

黃仲昭莆田人成化丙戌進士授編修改評事陞江西提學僉事氣岸屹立而思致安詳校文以理氣爲主錯綜斟酌毫髮不爽卽鼎貴子弟亦不少借竟以是休致

黃 璉

黃璉字汝器福建莆田縣人成化二年進士授南京戶科給事中陞浙江右叅議改雲南轉貴州叅政進布政卒於官嘗奏塞溫處新開銀礦罷其課民以爲便屯田多爲武臣侵盜璉疏理之普安賊婦米魯之變官多被誣獨不及璉其叅議浙江時嘗緣吏失公

為巡按御史所叅究致久次不遷後御史請幕下
身不修舊怨反薦之人稱其量云

周 璣

周璣字梁石初號蒙中子後號翠渠莆田人為學先
以敬收斂此心然後博物以窮理而反約以施博造
詣為至當年四十始登成化己丑進士初志欲觀斯
道之大全求會夫子之所謂一者及入仕自謂泊沒
仕途而志始雜初授廣德州知州首軫民惑於鬼神
著祠山雜辨又念民不知葬祭法溺殺女子著教民
雜錄立保伍以安民明禮法以育士善政不一而足

陞南京禮部郎中與人講邵氏蔡氏學者經世管鑰
律呂管鑰又苦字學無師承乃博采諸說爲字書管
鑰先曾與陳白沙友白沙曾與丘太守書稱瑛守廣
德而喜其有爲時白沙首倡習靜之說一時學者樂
其說之新奇而瑛獨不然其學有嘉魚舉人李世卿
學於白沙得其說歸遂居大厓山以老謂靜極則心
虚心虛則理見故視六經若土苴視形骸若仇敵視
聖人所以立禮義之防若纏束綁縛欲撤去之瑛與
世卿相知致之書略曰聖人靜有以立天下之大本
動有以行天下之達道求諸萬殊而後一本可得蓋

始學之要以收放心爲先務收放心居敬是也居敬則心存聰明睿智皆由此出然後可以窮理所謂窮理者非謂靜守此心而理自見也蓋亦推之以及其至焉耳積累既多自然融會貫通而於一本者自得之矣一本如穀種雖自塊然而根苗花實皆聚於此又如雞卵雖自渾然而羽毛嘴角皆具於此及其發見於行事在聖人體用一貫在學者未免差互蓋在己者有所拘蔽故所發不無偏重之殊在外者有所搖奪故所施不無遷就之意然而既復本原則於處善亦安循理亦樂至於患難事變雖以死易亦甘

心爲之此聖學之大略也今乃塊然靜坐求畢體用之學是釋氏之虛空也其論學如此瑛政績未竟所施而以畏天自信凡事必求合於天則始終如一年五十七時故蕭倅張公哲過臨汝謂在莆日嘗禱雨壺山絕頂上有地寬平可卜葬瑛昔愛山谷每躡屐登高有翹視八荒塵穢下土之心聞倅言喜曰是可授我矣因自叙履歷以示諸子曰我他日卽棄子子無粉飾吾事以誣天下後世但葬我此山之巔以此納諸幽足矣

宋端儀

宋端儀字孔時號立齋莆田人幼淳雅疑重不妄言
笑見先生長者應唯進退若老成人稍長攻舉子業
讀書必求通貫爲文必根義理年十六七侍父助教
學正安州每考校諸生學業必令儀預試一時在學
之士皆歎服以爲不可及又嘗侍父校文江右時御
史天台陳選監場屋因私試以文亦深器許之旣而
還莆著錄郡庠益自刻勵成化辛卯鄉舉小試儀偶
失利衆爲稱屈儀之祖舅學士林欲以書白于當道
儀曰此吾學未至縱求而得之亦可恥也遂閉門講
學竟不復請舉甲午登鄉闈第七人禮闈弗售卒業

成均辛丑擢進士第六人拜禮部精膳司主事委司本部及光祿寺諸署俸糧謹其出納雖部堂支給升合不得多取舊弊悉革尋丁內外艱起復改祠祭司適雲南提學憲臣缺選部議以屬儀偶爲鄉掾所知出以語人儀曰進秩之疏未上而已誼傳於衆口或者以我爲干乞耶遂力辭不受已而遷主客司員外郎未幾廣東提學缺時選部擬儀上請以內相丘徐二人沮之不許蓋徐初主考禮闈儀爲所取士繼進貳禮部儀爲其屬僚丘爲祭酒儀爲其門生皆受知遇及二人入相儀以今昔異地自正旦偕衆行禮之

外足跡未嘗一至其門二人疑儀忘德故有是沮官
主客二年凡四夷朝貢之使以方物贄見一毫不苟
取其或有所求請必條舉典故辨析開諭往往使之
心服以去俄廣東提學復缺拜按察司僉事既至嚴
立教法大要以崇本實黜浮華爲主而痛抑奔競革
奸弊以防壞法之源纖悉具備皆鑿鑿可行未幾疾
作卒自其少時已有志汎濫羣籍尚友古人凡鄉之
先輩皆考究而知其邪正賢否郡守青田潘琴以郡
學所祀鄉賢多弗科乃發策詢於庠序諸生惟
儀所對策考論精審潘大加嘆賞嘗著莆陽科名

志晚年復著人物備志善惡皆錄未脫藁其在禮部
時署清務簡尤留意程朱正學嘗考正宋史道學傳
進程氏門人呂大臨謂其深潛縝密富不在劉李尹
謝游楊之下又以程氏師友淵源朱子已有錄以示
後學而朱子門人亦多哲士尚未有表著之者因集
黃勉齋以下及私淑有得如真文忠諸公凡若干人
爲考亭淵源錄又嘗修祠部典故若干卷暇嘗修廣
東通志略宋行朝錄皆未脫藁又嘗編道南三先生
遺書及朱子事類宋氏族譜鄉賢考證莆陽遺事莆
陽舊事偶錄高科考立齋閑錄立齋稿若干卷藏於

家

林元甫

林元甫福建莆田縣人成化乙未進士授工科給事中進禮科都給事中陞山東右叅議雲南右布政陝西左布政都察院右副都御史巡撫四川已而改巡撫貴州尋改雲南正德元年乞養病還卒賜祭葬如例元甫身長美髯眉目朗秀襟度闊大不見畛域爲給事中數諫諍占城冊封有旨遣元甫矣以言事忤旨竟罷不遣德府妃葬欲大治瑩域元甫時爲叅政堅執不可卒易人董之歷官三十餘年家無厚貲平

居敦行孝友未嘗啓口及人過失僚友嘗被誣以身家保之竟不使之知也蓋一時長者云

黃乾亨

黃乾亨字汝夏莆田人生六歲而孤性敏甚及長好學善屬文出語輒驚其長老成化甲午以第一人貢禮部明年擢進士挺特自持不苟有附麗奉旨安置降胡於嶺南禮遺皆不受南人敬之丁祖父憂服闋念母老適回久之留妻子於家走闕下乞南都便養有沮之者授行人司行人副給事中林榮使滿剌伽國滿剌在嶺南西萬里外故事使臣得商賈募習海

事者以行有分堵常例銀度千兩亨卻不受或以爲
止副不宜異同乃留其半於官俾修靈妃祠布政使
彭鳳儀謂修祠守臣事不當煩使臣乃審遣以爲其
母壽亨迄不知癸卯正月發舟六日至羊嶼颶風作
舟溥於石溺死年三十二從弟乾剛侍行方舟壞時
且登矣視兄急不忍去遂同溺事聞贈亨從仕郎行
人司司副遣官諭祭錄其長子如金爲國子生如金
鄉舉亦第一登進士爲翰林庶吉士拜監察御史提
督南畿學政以文行稱

林俊

林俊字大用莆田縣人成化戊戌進士初授刑部陝西司主事性侃不與世浮沉推獄務明允事干權勢貴近莫適爲處者大司寇林公聰多屬之執法不撓名益起二十年陞四川司員外郎時妖僧繼曉挾近幸梁芳以祕書進得被殊眷發內帑銀數十萬兩營建大鎮國永昌寺俊上疏極論繼曉本一儉險小人市井無賴猥以邪術多方夤緣誤蒙 聖眷惑亂宸聰發內庫銀數十萬兩益大鎮國永昌寺以可用之財供無益之費 陛下以超三邁五之資蹈唐憲梁武之轍聖譽且日損矣然縱之者梁芳也梁芳傾覆

陰狼引用邪佞排斥忠良假以進貢買辦爲名盜
祖宗百餘年之府藏殆盡家資山積乃復薦進繼曉
陰求益寺虛耗內財言甚激烈 憲廟怒不可測俊
自分必死料理家事待罪於 闕下尋下詔獄加刑
俊對愈厲後府經歷張黻上疏論抹併下獄太監懷
恩叩頭力諍不肯奉詔 上益大怒謂其與林俊合
謀謗訕用御硯擲之恩以首承硯不中復怒扑其筆
恩脫帽辭於御前號哭不起曰不能復事陛下 上
乃命左右扶出至東華門使謂鎮撫司曰若等諂梁
芳合謀傾俊俊死若等不得獨生乃徑歸臥於家曰

中風疾不復起視事 上怒稍解謫遠方俊得姚州
判官徽得宗州知州時言路久塞臺諫禁不敢作一
語由是二人直聲震海內三原王端毅公在留都疏
乞還之以勵忠正會元日星變 憲廟感悟叙復南
刑部貴州司員外郎 孝皇踐祚廷臣交薦之擢雲
南按察副使俗崇釋信鬼鶴慶玄化寺稱有活佛歲
時士女會集動數萬人爭以金泥其面俊按鶴慶命
焚之父老言犯之者能致雹損稼卽與約積薪伺之
果雹卽止無它驗遂焚之得金數百鎰悉輸之官毀
邊方諸淫祠三百六十區四年陞本省按察使五年

調湖廣俊偉望宏才風儀整肅官吏斂戢不敢犯會
境內雨雪災異上疏陳言時政大略謂貴州借調官
軍措運糧餉軍苦戰鬪民疲輓輸又德安安陸葢造
王府及增修吉府工役浩繁財費鉅萬民不堪命乞
循寧襄德府故事一切省儉勿用琉璃及白石雕闌
著爲定例九年養病十一年起廣東右布政使仍舊
養病十三年拜僉都御史提督巡江時陝西地震水
涌上疏謂變不虛生必有其應歷述漢晉以來宮闈
內侍柄臣之禍且乞減齋醮清役占汰冗食止工作
省供應節賞賜戒逸欲遠佞幸親賢人謝方石見之

曰字少意長近時章疏當爲第一十五年命巡視江西著社約去淫祠表忠賢禁奸弊雖市販小害必懲之鋤強扶弱風紀肅然時寧庶人貪譎伎害倍取祿米官校害人侵牟民利悉裁抑之其奏易府殿琉璃瓦疏極言其非謂乞斷大義特垂善處毋涉吳王几杖之賜叔段京鄙之求時濠雖橫未有逆萌或以爲過後卒如俊言人服其先見云十六年改巡撫尋守制 武皇初政起巡撫江西俊上疏力辭四年改撫四川時逆瑾雖誅而張永用事 武廟好遊樂時宿於外而皇儲未建俊甚憂之五年遂於川中復上疏

請上還內宮擇宗室之賢養於別宮又召先朝故
老劉健謝遷林瀚王鏊韓文以修復舊政又言瑾雖
死權柄猶在宦豎安知後無復有瑾者其詞指剴切
太忤左右用事者時藍鄙之寇方劇至卽宣布 聖
恩勦撫並行屢以捷聞六年陞右都御史復疏乞賊
平容徑回致仕忌者竟爲批允先是軍中奏功多爲
中外權要冒報俊一切不許自是諸捷恩典寢薄賊
未平卽與致仕朝論駭科道保留不得及歸蜀人號
哭追送未幾而兩川之寇復熾矣 世廟在藩邸久
知其名入繼大統起工部尚書尋改刑部尚書俊屢

上親大臣勤聖學闢異端諸疏太監崔文寵擅一時
其私人李鳳陽以科歛匠作財物及御史叅奏崔文
需索夫錢事下刑部文負緣內降差校尉取李鳳陽
等付鎮撫司問俊據法執奏不遣有旨還送鎮撫司
俊又奏言奉詔則違法守法則違詔臣寧違詔不敢
廢法 上怒雖不加罪而鳳陽迄改錦衣衛獄俊又
疏谷大用竊弄威權蠱惑 先帝假勘地之名混占
產業莊田至一萬有餘頃侵欺子粒官銀至百萬餘
兩利歸私室怨及 朝廷伏望將谷大用提問追贓
以備賑濟不報俊以不得其職乃乞致仕在刑部立

朝僅卅四月暮年遭際罄竭忠愨以仰禪新政然尤以保終完名爲念遂乞休八疏乃允賜勅以行士夫祖餞於都門外道爭嘆其賢論者以數十年來大臣以禮進退無瑕隙可議者俊一人耳年七十有六而卒

鄭岳

鄭岳字汝華莆田縣人幼穎慧讀書數過卽成誦從學士黃公澗游文譽日盛弘治癸丑登進士觀政兵部馬端肅公甚重之甲寅授戶部貴州司主事督京倉糧倉故多贏羨公岳一無所取監倉中貴張某者橫

不可馭輒痛裁之幾爲中害秩滿請告歸葬家食二
年略不問戶外事林公俊異之與爲忘年友己未起
爲刑部山東司主事與錦衣千戶張福同監市囚福
恃勢踰坐岳論劾之語涉中貴逮繫詔獄侍郎許進
爲疏雪得微譴轉浙江司員外郎看詳章奏時許公
督師大同以剛方忤貴近議代之而廢閑總兵趙梟
黃緣起用京軍屢出重擾無功岳上疏言進不可代
梟不可用京軍不可出朝論是之辛酉陞湖廣僉事
所至以學校倉廩平反寃獄爲先施州民夷雜處忿
輒相殺衛帥以亂請兵巡撫韓公冷往視曰民愚習

開無他擒首事數人餘論遣之土官盜印相訐奏廉
其黠者寘之法追出偽印八顆其俗多縛賣客民岳
追出男婦百餘人有宦貧力不能歸者俱資遣之遷
衛學葺城樓閱軍實趙九谿永定皆邊衛俗獷一糾
以法荆岳饑勸粟出賑湖泊諸利聽民採取屬縣糶
當輸遠衛者率二石致一石岳以銀給軍以米備賑
乃倍得米全活甚衆宗藩侵民田奏勘頻年不決岳
奪還之民常德太守刑貨黷濫捕寘用事者於理守
解印綬去正德元年擢廣西兵備副使征里松洞表
捷及撫諭土官岑猛俱受褒賜築廣運足灘昭平二

堡爲府江重鎮改廣東副使滯獄一空遷江西按察使時逆濠橫恣虐害軍民岳鋤強振廢每事執法沮之饒撫姚源兵事旁午岳披星流汗決獄無遺有守隘官捕十四人於禁死者已四人岳取問垂斃瞪目訴曰我輩商於河南非盜解裝視之皆河南物釋之爲之醫療飲食皆得活陞江西右布政使尋轉本司左布政使勾稽宿弊行軍餉賞取辦倉卒間岳卒應之宸濠奪民田以億萬計民立寨拒守濠諷總制勦以兵三司無敢言者岳曰是皆良民不得已爲自全計耳何可兵濠聞之大恨會提學李夢陽與巡按江

萬實相訐奏行都御史陳全委三司掌印官會勘岳
欲平其理而宸濠力欲爲夢陽求勝憾岳言不合遂
誣奏無名賊私令校卒夾持合誣收猾胥入府令具
獄狀坐是削職爲民十四年濠反朝紳各論薦復除
四川以服未闕辭不赴十六年起巡撫江西都察院
右副都御史以水災奏減民賦二十萬築江岸省兵
快清滯獄別功罪祠忠節嘉靖元年召爲大理寺卿
時以擁立功欲封輔臣伯爵岳遣書蔣公冕義必力
辭冕然之上疏申明職掌曰陵戶任文舉法司查例
免差乃因太監扶義之請特免全戶千戶鞠王英法

司擬徒以太監閻洪之奏僅調外衛火者邵經分贓滿貫太監傅倫借債鉅萬法應提問俱送司禮甚非法行自近官府一體之義又以 上數不豫請遵

聖祖寡慾勤政之訓官寢限制進御有時清心省事自然有益退朝卽御文華裁決章奏日暮進宮不獨修身立政亦所以養壽命之源疏入報聞奉 命同

錦衣王佐勘甘肅兵變正總兵李隆謀殺巡撫之罪因災異岳進刑獄之失平者八事王欽罪當殊死今雖發遣仍合抄沒罪雖遇革贓應入官總兵朱麒縱僕爲患應合革回內官石明因債殺人法當成獄給

事中劉最鄴繼曾御史黃國用郎中顏如瓌等各犯
罪薄而充軍爲民大重御史馬明衡朱泚因 皇太
后聖旦免賀論列事雖失次心實無他併御史季本
陳逅員外林應聰論救乃併下獄南京守備叅員外
李堂事在彼中應發南京法司乃出爲典史此皆刑
獄之失平者也久之陞兵部右侍郎時大禮未定岳
上疏大意若以兩考爲嫌則但稱 孝宗廟號不必
稱伯考庶正統大意猶未失會內閣石瑄請如岳所
擬 上切責瑄奪岳俸二月先是大同兵變命侍郎
胡瓚往岳恐驚衆密令總兵桂勇斬首惡數人餘釋

不問而主兵者在率揚兵衆復據城叛及請增兵又
畏縮班師且以功叙章下兵部該科道官劾瓚等身
提大軍未收寸功兇孽未靖遽班師叙功罪在不道
又奏帶人等卿史輒爲覈實岳時以左侍郎署印執
不可駁行改正太監崔文欲陞其姪崔昂爲裨將岳
執不用內閣有所託不聽由是權璫嫌之岳因乞休
得旨俞允居鄉杜門自重絕干請若民間利病輒白
所司行之平心率物未嘗一毫侵牟於人性嗜學至
老手不釋卷詩文酬應無倦所著有山齋等稿

陳茂烈

陳茂烈字時周福建莆田人先世浙之瑞安人曾大父以軍功注興化衛總旗髫年喪父繼戎役勵志邁俗不與羣兒伍晝入公署夜歸讀書祖母憐其孱弱止之乃韜燈默誦不少輟年十八慨然嘆曰善學聖人者莫如顏曾顏之克已曾之日省豈非學之法歟乃作省克錄以自考弘治丙辰進士奉使廣東所司以故事致贖謝曰吾窮時嘗授徒兩臬司尚不規利於人况今日耶往拜陳白沙執弟子禮白沙與語累日甚喜告以爲學須主靜退而作靜思錄終身佩其教初爲吉安府推官時大體開至誠豪九寡婦財

誣許婚斷從守志夫制悍妻嫁有娠之妾既生子歸承其業族人爭之驗與姊氏爲類爭者媿服時守張本以嚴擊強徐輔以寬當道尚深峻徐開解爲霽信乎上下考績歸至淮乏寒具凍幾絕所知覆以敝裘得不死爲監察御史袍服朴素借騎一牝馬身若無官者尋以母老乞終養灌園蒔蔬太守閔其勞遣二力助汲閱三日往白守曰是使野人添事而溢口食也還之自供母外短床敝席不辦一蚊帳身治畦一蒼頭給薪水妻子服食粗糲皆人所甚不堪而泰然自足日坐斗室究極五經四書之旨體驗身心隨得

隨錄常曰儒有向上工夫詩文特土苴再吏部以養
母清苦奏改爲晉江教諭資其祿疏辭不拜旣又授
侍郎潘禮事例奏給月米又具疏辭臣家素貧寒合
本儉薄故臣母自安於臣之家而臣亦得以自遣甘
貧非誠有及人之廉盡已之孝也古人行傭負米皆
以爲親臣之貧尚未至是而臣母鞠臣守貧居寡艱
苦獨至臣雖勉盡心力之義竟未酬涓滴之恩且母
年已八十有六來日恐無多返哺至情固欲自盡咨
養月米心竊不安奏上不允時以母年九十未育嗣
息日夜爲憂方抱疾而母卒強起號哭寢地疾轉亟

卒林見素爲治殮且立其族子遠揚爲後都御史王應鵬薦以廉約如石守道而所養獨純孝行如徐仲車而所處尤困詔表宅里曰孝廉恤其家見素曰陳公領悟旣深而克養益熟隱衷粹行對天地質鬼神鄉國敬服殆黃憲管寧之流也

黃鞏

黃鞏字伯固莆田人弘治十八年進士推官德州府陞主事刑部掌十三司讞牘陞員外郎改兵部歷車駕職方郎中內艱服除會康陵北狩人心危疑或沮之且勿行鞏題於書屋曰石田茅屋爲生太拙鴟

夷馬革自許何患衆不能沮竟北上補武選正德十四年春上將南巡時宸濠久蓄逆謀蕭敬朱寧張銳在司禮錦衣東廠與濠交通江彬又握勁兵在上

左右公卿交疏不聽兵部司屬倡諸司上疏諫鞏曰上巡遊本起彬誘惑彬方席寵擅兵無敢斥言彬吾不可舍彬爲支語恐上不悟獨疏六事其略曰陛

下臨御以來祖宗之紀綱法度一壞於逆瑾再壞於佞倖又再壞於邊帥之手至是將蕩然無餘矣天下知有權臣而不知有陛下寧忤陛下而不敢忤權臣陛下弗知也亂本已生禍變將起竊恐陛下

知之晚矣試舉六事於今爲最急者一曰崇正學嘗
聞先儒周敦頤有曰吉凶悔吝生乎動吉一而已動
可不慎乎伏望 陛下高拱九重凝神定慮屏紛華
遠佞人二曰通言路切見近時臣僚奏牘間或言及
時政往往匿不以聞其或事關權臣則又留中不出
而中傷以他事由是雖有必亂之事不軌之臣陛下
無由而知伏望陛下廣開言路不責以出位不加以
好名則忠言日進雖亂臣賊子亦將有所畏而不敢
肆矣三曰正名號陛下近日以來無故自稱爲威武
大將軍太師鎮國公遠近傳聞莫不驚疑竊歎以爲

怪事夫陛下自稱爲公誰則爲陛下者伏望卽日削去鎮國公等名號以昭上下之分以明示天下之人四曰戒遊幸陛下始時遊戲不出大庭馳逐止於南內論者猶謂不可旣而幸宣府幸大同幸太原幸陝西榆林諸處所至費財動衆郡縣騷然虧損盛德貽譏萬世陛下自視爲何如主也近日復有南巡之命今江淮間父子兄弟相食天時人事如此加以休息愛養尤恐不支而况又重以感之其何不流而爲盜賊速而爲流亡也奸雄窺伺待時而發變生在內則欲歸無路變生在外則望救無及陛下斯時悔之晚

矣彼居位大臣用事中官親暱羣小皆欲陛下遠出而後得以擅權自恣乘機爲利也其不然則亦袖手旁觀如秦人視越人休戚不相涉也夫豈有一毫愛陛下之心哉五日去小人按今之小人簒弄威權至於首開邊事以兵爲戲使陛下勞天下之力竭四海之財傷百姓之心至今紛紛未已則江彬之爲也彬本行伍庸流兇狠傲誕臣等但見其有可誅之罪而不見其有可賞之功今乃賜以國姓封以伯爵托以心腹付以提督京營此養亂之道也彬今外挾邊卒內擁兵權騎虎之勢不亂不止天下之人切齒唾罵

皆欲食彬之肉彬不誅天下之亂必自彬始陛下亦
何惜一彬以謝天下哉陛下春秋漸高前星未耀
祖宗社稷之託懸懸乎無所終寄方且遠事觀遊屢
犯不測之區此必危之道也陛下徒知收置義子布
滿左右獨不能豫建親賢以承大業臣以爲陛下殆
倒置也伏望陛下早及是時共圖大議卽於宗室中
遴選親賢一人養於官中以繫四海之望待他日誕
生皇子之後俾其出就外藩實宗社無疆之休惟
聖明留意車駕員外郎陸震見公疏卽碎已疏草曰
願同署名進疏入自分必死彬見果大恨必欲殺之

縛下詔獄鉗校於廷五日三訊杖百餘坐繫逾月除
名輦體最羸衆咸痛其必死乃死得甦以詩遺弟曰
不用汝言方至此須知吾道固當然而震竟死當是
時海內盛傳其疏頌讚滯人口輦歸杜門著述家素
貧或至日中未舉火貸米鄰家恬不屑意嘉靖改元
召爲南京大理寺丞未幾卒無子贈大理少卿居嘗
自銘曰人生仕至公卿大都三四十年惟立身行道
斯千載不朽世之人顧以此易彼何耶沈敏好學雖
疾病支離手不釋卷詩文清粹和婉自成一家未究
其用人悼惜之陸震正德三年進士泰和知縣陞武

庫主事

孝貞皇后喪

武宗自宣府奔喪歸又復

欲出震抗疏諫

上怒罪且不測幸諸大臣力救得

免陞車駕員外郎杖於廷死矣復甦書與諸子曰吾

筆亂神不亂也竟以瘡故卒卒後三年贈太常少卿

子體仁廕國子生爲通政知事是時諫而杖死者主

事何遵劉校贈尚寶卿主事林公黼行人司副余廷

瓚贈太常寺丞刑部照磨劉珏贈兵部主事行人詹

軾劉槩孟陽李紹賢李惠三翰贈監察御史廕子一

人人國學嘉靖初禮部主事件瑜上疏曰正德間給

事中御史挾勢凌人趨權擇便交遊貴俠飲宴園亭

凡朝廷大闕失羣臣大奸惡緘口閉目不復救一時
犯顏敢諫視死如歸或拷死廷闕或流竄邊隅者皆
郎中員外主事評事行人庶吉士等官又張英本一
武夫入諫就死行道悲傷諸給事中御史揚揚出入
若罔聞之今幸 聖皇御極褒恤忠諍此輩更何面
目復立清明之朝耶章下吏部爲寢張英者京衛指
揮使聞 武宗南巡挾一刀囊土數升持諫疏當蹕
道跪哭諫不允卽拔刀自刎血流滿地侍衛人縛送
詔獄問英囊土何爲曰恐汚 帝廷灑土掩血耳殞
命獄中無子嘉靖初憐其忠贈都指揮官

方良永

方良永莆田人弘治初進士爲河南僉事以抗節忤逆瑾勒令致仕瑾誅復起歷浙江左布政使

馬思聰

馬思聰莆田人弘治乙丑進士官戶部主事督糧江西與宸濠生辰之燕翼旦入謝度必有變語厨人曰我倘不出將勅藏於高處厨人未諭其意姑如所示及入濠怒其不從果遇害配享豫章忠臣祠

陳騰鸞

陳騰鸞字士遠莆田人少喜讀先秦書爲文間窺其

指時莆學士大夫文尚明晰不欲闕廓深遠獨少保
林俊擅著作御史林有孚者負才藻爲俊鑒重素習
騰鸞一日請騰鸞草瞻紫亭記記就有孚具箋繕寫
楔之中堂會少保過有孚觀堂上記大嘉賞字呼有
孚曰以吉長進乃爾耶有孚以騰鸞告少保欲晤鸞
孚因爲鸞介少保相見討藝於是騰鸞遂得譽於文
林後登正德辛巳進士官民部郎中時少保起爲大
司寇鄭司馬岳佐本兵寓邸間日以文字相屬尚書
孫交秦金咸器許騰鸞未久卒於官貧無以殯官長
賻之始克治櫬丘秉文曰士遠固能文第非少保誰

解士遠文又曰昔謝安讀阮光祿白馬論不卽解阮
歎非惟能言人不可得正索解人亦不可得今之時
求騰譽能言者豈鮮獨無少保解耳秉文官光祿工
詞墨乃托阮自況云士遠浴江集有孚林坡志皆可
傳

魏一恭

魏一恭莆田人嘉靖己丑進士授溫州府推官答時
相子弟之侮慢官司者境內肅然歷陞江西布政使
一恭性剛方清約雖位方面囊橐蕭然嘗自言不要
官不要錢不要命則何事不可做故時人目之爲三

不要

陳言

陳言字宜昌號石溪莆田人少顯精力學文譽藉甚
初試有司不利氣嶽嶽不少控嚮往益堅家故貧嘗
授徒連州州帥與言善有持重賄有言白事者叱止
之曰貧吾分也嘉靖丙午魁省試明年丁未再魁南
宮成進士大宗伯泰和歐文莊雅重之請於銓曹以
爲邑令治泰和務伉直行已意有所興除不爲豪右
翫法尤恥伺上官指巧爲迎合撫臺某獵賄所部陰
屬言爲購書言陽若弗愉也者而束書露餽之某大

志謀螫言言因引疾謝不任請就教職得浙之湖州
湖胡安定故授徒處言至則申約束日切劘諸弟子
諸弟子執策請業前席爲滿間有跣跣不檢者輒蹠
之堂下譙讓之衆肅然敬已稍遷國子博士積歲不
調會 肅皇帝欲爲季都尉立傳政府欲私其子甲
太宰建安李不從竟疏言名以上於是得擢禮部儀
制司主事傅季異時都尉率貴倨驕其師言獨抗顏
自尊重務示都尉以禮時論高之越明年太宰李以
讒被譴政府修宿憾批根及言謫倅郴州郴故僻言
處之怡然無幾微見顏色而職事一切辦治暇則進

諸士講藝一如在湖州時會其年與事省闈得今武陵陳中允等六人皆知名士已擢知泰州值島夷江
江淮間幕府請餉甚急言周悉調劑下不殫民力而
軍興亦給州有疑獄所淹繫甚衆言訊立出之衆驩
感若更生尋轉南刑部員外郎晉郎中爲憾者所中
用守秦州事坐謗免歸歸三年而子公望登第言喜
曰吾志有托矣因營別墅一區名其室曰怡老堂優
游十五年而卒母黃卒諸同產纍纍言窮年講業盡
以所得資諸孤費無所私仕則又割俸予之者數矣
晚而林居稍稍葺先壟拓祀田叙次家乘若干卷曰

以此示子孫令無忘吾孝弟敦睦之行也

郭應聘

郭應聘字君賓號華溪謚襄靖莆田人六歲就傅卽
凝雋別羣兒嘉靖丙午舉於鄉庚戌第進士授戶部
主事典積芻督府咸寧侯部下橫索芻商賄聘特不
與以去就爭之咸寧稍戢竟不能釋憾司庾通州適
米湧貴聘令輸者得納糴及賈損則亟糴充庾而歸
羨金於朝上下交利司權清源以不涅稱司驗糧能
抑貴璫清宿蠹稍遷員外郎郎中在署凡六年拜南
寧守己未壬戌再覲遷四川按察副使備兵威茂崖

棧險艱墜溺相藉聘至下令刊山鑿石築孔道若干
里行者德甚稱郭公路松潘備兵使者缺聘兼領其
任西戎素驕數徼我厚賚歲費金繒累鉅萬不且羣
噪聘召諸番面諭禍福爲立賞格閱賞物而卻無名
之求諸番感威信各拜舞驩謝而去岐山鷺木二寨
久爲邊患聘以計蕩平之遷東粵叅政守嶺南時流
賊犯增城執辱前守吏聘至輒發兵逆擊破之二源
羣盜僭號僞授肆掠惠潮間聘率所部兵從制府吳
大破之晉西粵按察使尋晉右布政使忠州築酋黃
賢相與思明酋爭地聘密授略譚購內貳而携外援

遂夜擒賢相轉左使中丞殷公獮古田寇聘以綜餉
叅畫功拜金幣之錫亡何代殷任既授節鉞志清嶺
徼首奏忠州去土設流以終前功 詔報可予州名
新寧羅陽酉韋金彪之父若弟購彪急彪走獲之萬
箒中黃韋二酋不煩兵而俘府江峒徭數出斂江上
且破永安鹵其尉聘憤然請集土漢兵六萬分水陸
四部進討悉殲之分設土司并賦其地捷聞復平懷
遠諸叛徭拔巢壘百餘乘勝勦永寧寇獲首虜千級
因上懷遠善後十事 上從之晉少司馬填撫如故
已召入爲大司徒先是東山營卒亂聞聘至爭馬降

聘戮其元兇它釋不問覽東事慨然曰人心獨幸亂
哉措兵股民咎實在上乃作旌廉杜餽功令頒誠將
吏諸將吏廩廩亡敢操一幣詣制府者召掌留臺旋
筦樞上章乞歸卒

柯維騏

柯維騏字奇純號希齋莆田人弱冠釋褐南宮爲南
戶部主事移疾請告歸烏石山中聚舊業而抽繹之
別淆亂訂是非會萬於一及門之士執經而問難者
日益雲集先後至四百餘人傳授靡倦要以躬行爲
先慨近世學者樂徑悟而憚積累竊禪家之說以佞

孤陋作左右二銘明其意著講篆二卷以辨心術端
趨向爲實志以存敬畏密操履爲實功而其極以宰
理人物成能天地爲實用至於學之次第懇懇致意
於誠之一字謂心與理一之謂誠言與行一之謂誠
終與始一之謂誠蓋允蹈之也又錄所荅問釐爲心
解學解經解上下傳解史解六卷多儒先所未發門
人共服膺之梓而傳焉宋舊史契丹女直與宋並帝
時號宋遼金三史蓋出於元儒所修冠履莫辨褒貶
不公騏乃著宋史新編二百卷會三史爲一而以宋
爲正統遼金列於外國傳以尊中國瀛國二王升於

帝紀以存宋統正亡國諸叛臣之名以明倫升道學
於循吏以重道釐複補漏擊異訂譌閱二十寒暑始
克成書泰泉黃佐序謂西漢之書不得專美於前是
編行則三史廢稽天運陳人紀莫之或先矣又作史
紀考要十卷凡班氏之譏評爽實漢書之增損垂義
少孫之補綴亂真諸儒之紀載異同胥辨正之而天
文曆律發明尤詳又以莆陽文獻自嘉靖以來屢經
兵火懼其遂湮乃撰次爲二十卷以接山齋鄭岳之
筆曰續莆陽文獻志與宋史新編俱以三品論人謂
求道德之士於三代之下必欲如古聖賢難矣但能

忠信廉潔以禮義爲進退以名節自砥礪此其根本也根本既立雖乏功業文章不足爲病根本一喪卽富貴功名鄙庸人耳何足取哉著有詩文集十卷續集四卷雜著二卷卒年七十八

補遺

林祥鳳

林祥鳳字鳴臯福建莆田縣人宣德元年舉人十年由鄆城縣訓導擢雲南道御史正統十四年從駕北征死于土木之難

周彥

周彥莆田人正統戊辰進士授戶部主事己巳之變
郊有戎壘提千率分主給餉虜去監收京儲景泰初
勞軍于西蜀歸復差通州等處備收芻芻在京通出
納嚴明夙蠹盡窒軍民德之天順改元拜知温州府
浙東之俗習尚華侈巨室好事關節以立聲勢吏胥
善設間符以氣相勝到官正己率下內外有截申嚴
禮制諸爲奸者相戒遁迹郡地邊海埧江沙漲在處
不清而稅不視業民以病告按量得實爲更正之貧
戶始蘇他如學社輿梁之類屬有司當行者無不完
繕郡以大治而性豪整廉隅外見不能爲齷齪細謹

卷之四
四九
態遂致政而歸於時太夫人翁氏尚無恙樂養之暇
構載德堂以奉晨昏寶書堂以榮誥勅文會燕遊意
甚適也成化十三年以疾卒年五十七

林誠

林誠字貴寶福建莆田縣人天順八年進士除廣東
道御史成化四年疏論輔臣廷杖復職巡鹽長蘆督
學南畿請告十九年復除湖廣道二十年巡鹽兩浙
致仕卒

陳仁

陳仁字子居自號三渠莆田人發解閩省成化丁未

登進士爲戶部主事採輯實錄再爲員外郎郎中專力問學作古文詞大僚章奏多出其手闕里災疏脩省又疏雪冤獄罷江南織造復御史彭程給事中林廷玉等官陝西守臣進古璽又疏其僞正德初從司徒韓公文伏闕請誅嬖闖鼓怒逆瑾中之落三官同知鈞州再知汝州轉南京兵部員外郎掌武學瑾誅轉浙江提學按察副使權量精審案手自披閱不付吏積勞成損轉爲藩叅疾已作尋起尋復疏乞休致進右布政使致仕命下卒已彌月矣壽六十一所著三渠稿天津志行於時

李廷梧

李廷梧字仲陽福建莆田縣人弘治十二年進士由
桐鄉知縣選湖廣道御史建言杖獄陞大理寺丞疏
請致仕

林有孚

林有孚字以吉福建莆田縣人正德五年進士除山
東道御史議大禮廷杖復職十一年督學南畿十七
年督學北畿二十年陞大理寺丞昇陞僉都御史總
督糧儲疏請致仕

林文俊

林文俊字汝英別號方齋莆田人正德丁卯鄉試發
解第一辛未舉進士選翰林庶吉士癸酉授編脩儼
室都下安澹素以養二親旋自都奉視南歸戚毀踰
禮服闋復官預脩武宗實錄充經筵展書官實錄
成擢春坊進經筵講官嘗以不能俯仰權貴幾擠外
補賴受知世廟得免擢南京國子祭酒條教平實
範人以身而人樂信從法行自貴游子始資叙井井
無所紊有生遇盜緩期法當贖金將鬻子聞之惻然
捐助吏議卒免贖先是有旨命國子監校刊二十一
史未就至則躬率諸生讐校竄補恒至達曙不數月

鏤梓上獻 聖心嘉悅每御文華殿指示諸臣曰此祭酒林文俊所刊書也擢南京禮部侍郎會太廟災自劾求退輒荷溫旨改吏部視冢宰篆百爾明慎題奏精詳雖老于吏事者莫過也素精于五行數年前常自言運行至戌不吉已而果驗享年僅五十計聞贈南京禮部尚書賜祭葬兼錫之謚於是太常議謚曰良曰恪而 御筆特改曰文脩蓋近代文臣所未有之異數也

張曰韜

張曰韜字席珍興化府人正德丁丑舉進士授常寧府

推官會郡邑長吏入覲曰韜兼綰郡邑篆時武宗南巡江彬以寵幸扈從留京而縱其黨數十輩下潤州橫索勢張甚曰韜立召二三父老并民間豪傑格之境上而又釋囚徒呼乞兒輩各具尾石徃投之部署已定彬黨各累騎來父老先以好言慰諭之常州連歲災沴物力大絀卽欲具芻草以秣若馬亦卒卒莫辨彬黨揮策徑入而囚徒乞兒飛石飄瓦爭中其額乃退里餘令數人馳告彬曰韜亦卽上書御史臺言狀御史東郊卽行部抵毗陵謂韜曰事迫矣彬且以他狀逮君子理乃命韜登御史舟先發日以小舟

尾之已而彬黨果誤截御史舟御史出身示之命疾
捕截舟者陰令縱之於是諸黨悉遁彬後方戢其黨
毋再下郡國 世廟登極曰韜以卓異徵拜御史入
臺僅四月抗陳時政得失凡七疏最後抗論大禮廷
杖幾絕鼻出猶以布裹臀肉強扶上馬歸質明卧地
牀上復口具疏進云臣言狂諄乞賜黜斥越三日而
死隆慶初元追贈光祿少卿

陳琳

陳琳字玉柔莆田人進士爲御史提督南畿學政忤
逆瑾被謫正德初同知嘉興府梁材爲守專務以德

化民請託不行延獎諸生興起道藝士民親愛尋遷
山東提學副使終南京兵部侍郎

鄭一鵬

鄭一鵬字九萬號抑齋莆田人正德辛巳進士選庶
吉士改給諫奉使楚藩餽遺盡却巡視光祿疏陳十
四事既復論攬納侵冒內璫橫索之罪置之法寺中
宿弊一清而近倖多側目矣以議大禮伏闕廷杖三
十雖被挫折志操愈勵仍極論席書張璉桂萼方獻
夫妄議以搖國是復論武定侯郭勛通賄賂皇親張
鶴齡占土田當路憾之會考察官拾遺畢取上旨

令科道互相糾劾一鵬倡諸僚執奏宣言非事體不敢奉詔上震怒權倖從而擠之廷杖六十罷爲民醫肉削盡瀕死得生家居凡二十六年而卒隆慶初元追贈光祿少卿

朱澗

朱澗字必東福建莆田縣人嘉靖二年進士除御史建言廷杖罷歸

鄒守愚

鄒守愚字君哲興化府人嘉靖丙戌進士授戶部主事歷員外郎郎中議行平糶法奏發帑金賑全陝饑

劾諸中貴冒薦莠與爲逋逃主者諸所持論諤諤不
阿出守廣州訟劇政焚多宿蠹守愚一處以至誠事
存矜惻嘗辨誣獄釋累歲繫不決者至數百人有庖
人烹鷄雜以茄羹色黑御史以爲毒已也坐以重辟
守愚獨疑之令人如所具烹焉亦黑乃力爭御史前
曰職誠不忍見一無辜伏死地御史悟竟釋之政聲
於是大振值歲饑設策賑濟民賴以甦新會民激于
徵逋聚海艘爲變監司招之不應曰必鄒使君來也
守愚單騎往民望見輒涕泣解散安南不庭 上命
將征之擢守愚廣東憲副協理兵務乃疏五事多見

孫納聞父計奔歸其後安南降論功蒙上賞服闋起
江西憲副兼攝學政所甄拔士先後登科第顯聞者
尤多改河南叅政歷左轄時師尚詔偕歸德諸州郡
率兵討平之繼汴河溢歲且旱盜起梁宋間 詔以
守愚巡撫其地綏馭有方境宇敕寧乃晉戶部左右
侍郎尋積勞病作卒計聞 上嗟悼贈右都御史謚
襄惠

林潤

林潤字若雨莆田人嘉靖丙辰進士除臨川令嘗以
勾攝至未豐適盜賊猝起城幾殆潤立爲畫城守策

賊卻未豐人尸祝之擢南京御史卽首論祭酒沈坤以非法支解人甚衆縱妾父持塩利坐受賈人金無筭又以營葬地謀敝其旁數十里輒齧齧人墳墓

天子切責祭酒置之理次論副都御史鄔懋卿懋卿相嵩最近幸門生也已復持世蕃羅龍文大逆狀上之龍文以賈人子附入門客除中書舍人者也分宜父子啣之刺骨屢欲中傷之會世廟用御史鄒應

龍言戊世蕃于雷州龍文于潯州二豎出長安門卽以力脅監謫者縱亡之家龍文數入袁州私候世蕃且陰與計事會濶按視上江廉得其徃返狀于是大

發其奸惡不道極言于上得旨世蕃龍文磔于市籍資世蕃二百萬龍文二十萬没入于官中外快之潤累陞至都御史開府姑蘇首訪民間疾苦爲上封事十餘條慨切惻怛上允行之尋卒于官視返各爲位遮道祭哭凡三日

鄭茂

鄭茂莆田人進士嘉靖三十二年知海鹽精敏超卓有應變之才倭寇擾境盡力守禦克完民社擢兵科給事中民思之立碑焉

福建邵武府

謹賤生

謹賤生邵武人洪武中以國子生授岳池縣典史與知縣王佐進須知坐事下獄耆老二十餘人詣闕訴二人廉介且役均民安勘問果如所訴遂賜衣靴筵宴以旌之復其官尋用薦擢四川按察司僉事

龔仲賢

龔仲賢光澤人父均實早喪家貧母吳氏紡績撫養底於成人洪武壬戌母以壽終仲賢痛念不已卽母誕日刻木肖像以奉衣服飲食一如生前出告反面

朝夕不怠妻王氏亦知孝奉養未嘗有違凡十八年
如一日鄉里咸稱爲孝子

何道旻

何道旻字伯清泰寧人洪武末爲大理評事獄獄多
平反時有疑獄大脚板坐強盜久不決高廟臨問
責理官以受賄道旻犯顏力爭竟白其事遷監察御
史照刷四川文卷及問齊邱謀判事皆稱旨陞江西
按察司副使贛賊陳平爲亂討平之止誅其首志移
湖廣建言時事得失皆蒙采納後坐事免官永樂初
起爲廣東按察司僉事首舉廉潔之修甯陽

壤開溉田七十萬頃尋督工匠營造北京凡六歲人咸德之宣德初擢永州府知府事必親區畫吏不能欺民不以病再期致仕卒

蕭永泰

蕭永泰建寧人國子生授廉州推官誠朴廉謹嘗招降木頭洞賊四千餘人後陞濟寧州同知剽繁治劇綽有餘能部使者皆器重之後引年致仕

吳琬

吳琬建寧人洪武末進士任戶部主事精於吏治操履清謹尋陞員外郎卒

花潤生

花潤生字蘊玉邵武人永樂甲申登進士第初爲古田令創公署興學校教民種藝爲弟子置書籍親課其業美績甚著遷浙江市舶司副提舉擢浙江按察司僉事以尚書王直薦改提督學校年未七十卽引年告老歸潤生資性剛方詩文雄健嘗考應天府鄉試兩考會試晚年言動愈謹足跡未嘗輕至公府有介軒集

吳翬

吳壘字信玉邵武人自幼端敏謙厚永樂戊子領鄉

薦卒業太學授兵部主事遷郎中遂爲戶部右侍郎
正統壬戌北虜來貢馬同官皆以不事事下獄璽時
以疾在告辭連及璽謫戍威遠

張誠

張誠建寧人永樂己丑進士除御史用法平恕遇事
敢言巡歷交趾鎮守大臣及中貴有不法者誠廉而
劾之悉寘之法爲一時御史首稱繼巡浙江湖廣所
至皆有聲後致仕卒

上官祐

上官祐字用孚工詩博學永樂丁酉鄉試以春秋魁

八閩初爲新城縣教諭薦擢弋陽令有武陽志鶴林
集

朱祐

朱祐字逢吉邵武人永樂間以國子生授兵部職方
司主事調紹興府通判凡有便於民者必力爲之官
德癸丑大饑故事倉糧請而後發祐徑以畀民秩滿
士民上章請留又七年乃去稚耄咸拜送有泣留不
百里者尚書郭璉薦知漢陽府郡舊無官庾軍民
江支納數遭覆溺乃請立倉城中軍民便之正統
卯紹興父老詣京乞除祐守本郡比至而祐已

致仕矣

曾真保

曾真保邵武人永樂間進士除浮梁知縣清白持身
恭慎爲政嘗疏中貴人狀罪戮之民獲安帖後任率
平生耿介剛直士大夫咸羨慕之

余隆

余隆建寧人領永樂戊子鄉薦歷官選部員外郎性
恬退未嘗躡跡豪門大爲縉紳輩稱許

黃原昌

黃原昌建寧人永樂間登進士拜行人持重有節槩

宣德改元頒正朔出使占城得使臣體贈以金帛奇物悉却之陞戶部員外郎時奔競之風熾原昌取隨流俗浮沉遂請老以休致

黃昌

黃昌建寧人由國子生歷象州陸安州同知所至鋤強伐暴興學勸農多有政績陞光祿署正歷官三十餘年未嘗有過舉

黃孟舟

黃孟舟光澤人宣德初應求賢舉擢慈利知縣廉能謹慎愛民如子民戴之如父及卒民爲立祠肖像祀

之

陳泰

陳泰字吉亨福建邵武府光澤縣人儀度修整言簡而有章淹貫經史喜爲詩永樂癸卯發解鄉闈宣德丁未會試乙榜除直隸安慶府學訓導以得教育英才爲樂正統丁巳廷臣交章薦其賢擢爲江西道監察御史累奉命巡按貴州山西山東諸藩克振風紀奕奕有重名在貴州都指揮官聚素桀驁聞泰至不敢肆其奸大軍征麓川歲取士兵二千爲鄉導將士或失利輒殺士兵以爲功泰奏罷之夷人仰戴如

父母越數月召還調陝西道各道有疑獄皆以決於
秦無或稱冤者在山西會南北圻旱澇相仍 詔下
求直言衆皆以爲天災秦獨言洪範庶徵皆由人事
乞罷大臣不職者以格休徵於是都御史陳智侍郎
李庸祭酒貝泰等皆罷去奉勅舉山西藩憲及州縣
官之貪殘者悉置之法在東藩以憲多匪人陳疏懇
懇數千言大要以選賢去奸爲治本 上嘉納之擢
爲四川按察司按察使不踰年而蜀大治鎮守都御
史寇深忌其才名陰諷所私叅議陳某誣奏泰杖殺
人下刑部獄其人實自溺水死久而始白復官已已

虜寇內侵命協同將官守備紫荆關及巡視沿邊諸寨景泰改元陞大理寺右少卿守備白洋口轉右僉都御史鎮守易州節制紫荆倒馬等關及沿河關口三十六處泰早夜究心畫計忘其勞虜知有備遂遁去及考察大名廣平順德河間諸府衛官吏去留咸當人心既而三上章辭位不聽益勵勤以圖報稱甲戌陞左僉都御史疏理徐州呂梁二洪及臨清濟寧諸處河道丙子巡撫蘇松常鎮及嘉湖諸大都泰蒞下嚴而不苛爲政清明吏不能高下其手以侮公法天順改元以讒言左遷廣東按察司副使連丁父母

憂去壬午服闋復左僉都御史巡撫四川蜀中老稚皆熟泰名聞泰至奔走相賀曰陳憲使復來矣蜀其將安以嬉乎州郡望風解組者數百人甲申陞右副都御史巡撫淮揚等處兼督漕運軍民皆安之成化改元上章乞歸辭甚切上念其効勞有年賜允薦紳大夫宴餞於都亭車蓋塞途都人聚觀以爲榮家居五年卒所著詩文有拙菴宗奏議藁武陽志藏於家

鄒允隆

鄒允隆光澤人名昌以字行登正統壬戌進士第

太常博士陞寺丞凡大典儀文卿佐不能決者率取
正於允隆改太僕寺丞天順初副詞臣黃諫往諭安
南旣至其酋跣裼倨傲允隆與諫正色裁之始懾服
致謹尊王之儀還朝未幾以學行擢廣東按察司提
督學校僉事

李剛

李剛泰寧縣學生正統戊辰沙尤寇發剛與鄉人同
匿山間一日出遇賊賊脇剛從逆剛以義數之賊怒
令跪剛不屈罵之不絕口遂遇害

徐溥

徐溥邵武人第正統戊辰進士拜監察御史卒於官溥氣質剛方才華卓犖持節按部風紀肅清

謝 嫌

謝嫌邵武人景泰初進士拜監察御史持憲嚴明人不能奪累官廣東左叅政所至皆有聲稱

余 志

余志建寧人父隆歷官選部員外性恬退未嘗躡跡豪門爲時輩所稱許志登天順甲辰進士授刑部主事審決重獄號稱平允坐誣出判廣州嘗請出絕戶田以安集流民三萬口陞知石阡府夷民安之遂致

仕

朱欽

朱欽字懋功福建邵武縣人成化壬辰進士授寧波府推官擢監察御史風采凜然陞山東副使以憂去服闋改浙江尋陞按察使湖廣左布政使進右副都御史巡撫山東以民俗多酣酗下令禁釀適內使過境索賄不從謗於瑾被逮入京然瑾竟不能害得致仕歸尋撫舊事奪其職瑾敗仍復之欽端重有威儀居官清直所至以聲績著爲諸生時刻意考亭之學往遊徵士吳與弼之門以道學稱於閩年七十七而

卒

陳讓

陳讓字原禮邵武人也少穎異不羣爲文奇崛遒勁不爲蹈襲語嘉靖辛卯舉閩省第一尋登進士授紹興府推官聽獄稱平暇則進諸生校藝講學士彬彬興起天真祠之置圭田三江閘之捍海患讓區畫贊襄之力爲多徵拜監察御史遇事敢言無所諱避

肅皇帝旣嗣大統迎 興獻太后入仁壽張太后仍以藩妃禮遇之兩宮以是有郤巨俠劉東山者睥睨兩宮間將以奇論取富貴乃令其黨構誣張鶴齡只

弟有逆謀左道呪詞連宮禁逮繫無辜數十百人
都城騷動諸司不敢出一語讓方視事東城遂捕東
山下獄究其罪東山度不可脫益令其黨告變且誣
讓爲張氏羽翼併下之獄乃從獄中上疏謂 陛下
有帝堯九族旣睦之德而東山乃敢對陛下倡言漢
武巫蠱之禍陛下有帝舜克諧底豫之孝而東山乃
敢對陛下公言暴秦遷母之事宜亟正典刑以安宗
社 上覽疏意稍解會西曹鞠東山所奏悉無驗併
其黨坐欺謾伏誅讓得還職京師宴如當是時微讓
仁壽宮危人心搖矣已而 興獻太后登遐廷議遷

興獻帝合葬天壽讓以藩王不宜入附 皇陵乃借

堪輿家爲言顯陵氣脉不可洩又重於勞民請以袞

帔交葬便 上初覽奏怒甚投疏於地少頃復取視

曰此言亦是於是遂定不遷之議而執政從旁擠之

竟賜罷然讓身雖退而言則已行矣讓在臺中二年

疏屢上皆侃侃大計獨此二事尤人所不敢爲不敢

言者咸謂讓有社稷之功焉既退休里中日夕靜坐

讀書孜孜學問口不談當世事惟地方利病所關輒

不惜齒頰疊疊爲上官陳說爲人剛方廉介見者竦

憚然與之久處談論慷慨真意溢出人益信慕之

上自承天還猶問讓姓名臺使者至閩輒以讓薦於
朝而執政終忌之置不用家居十五年而卒隆慶改
元錄先朝諫者贈讓光祿少卿所著有見吾文集
十卷邵武府志卷十卷行於世